

**MESYUARAT KEDUA, PENGGAL PERTAMA
PARLIMEN KEEMPAT BELAS**

2018

HARI ISNIN : 15 OKTOBER 2018

**DEWAN RAKYAT
PEMBERITAHUAN PERTANYAAN
MESYUARAT KEDUA, PENGGAL PERTAMA
PARLIMEN KEEMPAT BELAS (2018)**

PERTANYAAN : LISAN

TARIKH : 15 OKTOBER 2018 (ISNIN)

**DARIPADA : TUAN FONG KUI LUN
[BUKIT BINTANG]**

SOALAN : 1

Tuan Fong Kui Lun [Bukit Bintang] minta **PERDANA MENTERI** menyatakan hasil lawatan rasmi beliau dan rombongan ke Negara Republik Rakyat China, perkara-perkara yang dibincangkan dan dipersetujui dan langkah-langkah yang diambil untuk meningkatkan hubungan dua hala dari segi perdagangan dan kerjasama ekonomi.

**JAWAPAN: YAB TUN DR. MAHATHIR MOHAMAD
PERDANA MENTERI**

Tuan Yang di-Pertua,

1. Seperti mana Ahli Yang Berhormat sedia maklum, saya dan delegasi telah mengadakan lawatan rasmi ke Negara Republik Rakyat China pada 17 hingga 21 Ogos 2018 atas jemputan daripada Tuan Yang Terutama Li Keqiang, Perdana Menteri China.

2. Tujuan utama lawatan rasmi ini ialah untuk meningkatkan persefahaman hubungan dua hala antara Malaysia dan China dari segi perdagangan dan kerjasama ekonomi berikutan perubahan lanskap politik di Malaysia. Penjelasan tentang prinsip serta pendirian Kerajaan baharu Pakatan Harapan yang mengalu-alukan kemasukan pelaburan asing yang tulen serta bermanfaat untuk kedua-dua buah negara turut dibincang dan diterima baik. Ia menjadi asas bagi perbincangan lanjut di peringkat pegawai dalam mencari penyelesaian berkenaan hutang pentadbiran terdahulu berjumlah berbilion ringgit yang didapati terlalu tinggi, membebankan dan tidak bermanfaat kepada negara pada masa ini.

Tuan Yang di-Pertua,

3. Di samping pertemuan dengan pemimpin-pemimpin Kerajaan Republik Rakyat China, saya dan delegasi juga mengadakan lawatan ke syarikat-syarikat terkemuka China dan pertemuan dengan ahli-ahli perniagaan. Kita dapat China telah mencapai kemajuan yang pesat dalam pelbagai bidang. Antaranya dalam bidang pertanian, automotif, teknologi pembuatan pesawat tanpa pemandu (dron) dan teknologi maklumat.

4. Lawatan ini memberi banyak idea kepada kita yang mana hasil penyelidikan dan pengalaman mereka boleh digunakan untuk memperbaiki lagi cara-cara kita mengadakan perusahaan di Malaysia. Kumpulan Alibaba telah bersetuju untuk berkongsi dan memberikan latihan kepada sektor Industri Kecil Dan Sederhana Malaysia terutama dalam bidang e-dagang dan penguasaan teknologi. Proton Holdings Berhad dan Zhejiang Geely Holding Group pula telah memeterai *Heads of Agreement* yang

merupakan perjanjian persefahaman pemindahan teknologi daripada Geely kepada Proton dalam teknologi tenaga boleh diperbaharui yang akan dapat meningkatkan mutu industri automotif negara di samping peluasan pasaran ke negara berkenaan.

5. Saya juga berkesempatan mengadakan satu sesi Dialog Bersama Pemimpin Perniagaan dari Malaysia di Beijing, yang disertai seramai 93 orang pemimpin korporat dan satu sesi pertemuan tertutup dengan 9 orang ahli perniagaan dari China yang mewakili syarikat-syarikat ternama, yang juga merupakan ahli kepada China Entrepreneurs Club.

6. Pertemuan selanjutnya diadakan dengan ahli-ahli perniagaan Malaysia dan China. Semasa bertemu dengan seramai 400 orang ahli perniagaan berkenaan, saya telah memberi jaminan bahawa hubungan dua hala antara Malaysia dan China akan bertambah kukuh di bawah pentadbiran Kerajaan semasa. Saya turut meyakinkan dan menggalakkan komuniti perniagaan China untuk melabur di Malaysia.

Tuan Yang di-Pertua,

7. Dalam pertemuan saya bersama komuniti perniagaan serta pemimpin-pemimpin Kerajaan China, saya telah menegaskan bahawa Kerajaan Malaysia menyokong pelaksanaan Inisiatif *Belt and Road* (BRI). Bagi Malaysia yang penting ialah kapal-kapal dapat menggunakan Selat Melaka dan Laut China Selatan tanpa gangguan. Malaysia sebagai negara dagangan bergantung kepada laut untuk kebanyakan import dan eksportnya.

NO. SOALAN: 1

8. Kita menggalakkan pelaburan dari China. Namun, pelaburan-pelaburan ini perlulah memberikan peluang pekerjaan kepada rakyat Malaysia, menggunakan bahan-bahan tempatan dan peluang pemindahan teknologi kepada industri tempatan. Pelaburan tidak termasuk membawa orang asing bermastautin di negara ini.
9. Sebagai permulaan, sukacita dimaklumkan bahawa pihak China telah menyatakan kesediaan untuk mengimport 500 ribu tan minyak kelapa sawit tambahan dari Malaysia dengan syarat harga yang kompetitif ditawarkan.

Tuan Yang di-Pertua,

10. Secara keseluruhannya, 5 buah Memorandum of Understanding (MoU) dan Perjanjian antara agensi-agensi Kerajaan telah ditandatangani semasa lawatan tersebut. Saya juga turut menyaksikan pemeteraian 2 perjanjian antara syarikat Malaysia dan China. Selain itu, Malaysia dan China yang telah mempunyai hubungan dua hala yang kukuh sejak terjalinnya hubungan diplomatik lebih 40 tahun turut bersetuju untuk terus mewujudkan hubungan yang lebih dinamik serta saling bekerjasama meneroka bidang-bidang baharu yang bakal mendatangkan manfaat bersama dalam bidang teknologi, industri dan inovasi.

Sekian, terima kasih.

MAKLUMAT TAMBAHAN

**SENARAI MEMORANDUM PERSEFAHAMAN / PERJANJIAN YANG
TELAH DIMETERAI SEMASA LAWATAN RASMI YAB PERDANA
MENTERI KE REPUBLIK RAKYAT CHINA,
17 - 21 OGOS 2018**

Memorandum Persefahaman/Perjanjian di antara Kerajaan Malaysia dan
Republik Rakyat China

1. *Memorandum of Understanding between the Ministry of Finance of the People's Republic of China and Securities Commission Malaysia on Accounting and Audit Cross-Border Regulatory Cooperation;*
2. *Extension Agreement regarding the Chinese Yuan/Malaysian Ringgit Bilateral Currency Swap Arrangement between the People's Bank of China and Bank Negara Malaysia;*
3. *Protocol of Inspection and Quarantine Requirements for the Export of Frozen Durian from Malaysia to China between the General Administration of Customs of the People's Republic of China and the Ministry of Agriculture and Agro-based Industry of Malaysia;*
4. *Memorandum of Understanding between Hainan State Farms Bureau and Hainan State Farms Investment Holdings Group Co., Ltd. and Malaysian Rubber Board on Collaboration in the Area of Rubberized Bitumen Road Technology and Rubber Tapping Automation and Mechanisation; dan*
5. *Memorandum of Understanding between Tsinghua University and Malaysian Palm Oil Board on Technology Development and Promotion of Malaysian Palm Biofuel.*

Memorandum Persefahaman/Perjanjian di antara Syarikat Malaysia dan Republik Rakyat China

1. *Heads of Agreement between Proton Holdings Berhad and Zhejiang Geely Holding Group Co., Ltd; dan*
2. *Memorandum of Understanding between Sime Darby Plantation Berhad and COFCO Group Co., Ltd on Technical Development on Further Downstream Applications for Palm Oil and Palm-based Products in China.*

PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA,
PARLIMEN KEEMPAT BELAS

PERTANYAAN : JAWAB LISAN
DARIPADA : DATO' SRI HAJAH ROHANI BINTI HAJI ABDUL KARIM [BATANG LUPAR]
TARIKH : 15 OKTOBER 2018 (ISNIN)

SOALAN NO. 2

Dato' Sri Hajah Rohani Binti Haji Abdul Karim [Batang Lupar] minta MENTERI PEMBANGUNAN WANITA, KELUARGA DAN MASYARAKAT menyatakan berdasarkan trend kes-kes tekanan jiwa/mental yang semakin meningkat pada masa kini, apakah peranan dan tindakan serta program-program yang dilaksanakan oleh Lembaga Kaunselor di dalam menghadapi perkara ini.

**JAWAPAN: YAB DATO' SERI DR. WAN AZIZAH DR. WAN ISMAIL,
TIMBALAN PERDANA MENTERI MERANGKAP
MENTERI PEMBANGUNAN WANITA, KELUARGA
DAN MASYARAKAT**

Tuan Yang di-Pertua,

Peranan kaunselor dan perkhidmatan kaunseling kini dilihat sebagai keperluan yang penting, terutamanya dalam situasi masyarakat yang semakin berhadapan dengan pelbagai tekanan kehidupan. Lembaga Kaunselor merupakan pertubuhan perbadanan yang ditubuhkan di bawah Akta Kaunselor 1998 [Akta 580] bagi menguatkuasakan Akta ini. Lembaga Kaunselor berperanan memastikan perkhidmatan kaunseling profesional dilaksanakan berdasarkan standard yang telah ditetapkan dan latihan kepada kaunselor di Institusi Pengajian Tinggi (IPT) sama ada awam atau swasta adalah mengikut piawaian oleh Lembaga Kaunselor.

Lembaga Kaunselor telah mengambil pendekatan proaktif dengan menguatkuasakan fungsinya sebagaimana diperuntukkan dalam Akta dengan mengadakan program kepada kaunselor berdaftar bagi mempertingkatkan kompetensi kaunselor dalam menghadapi kes-kes sebegini. Sepanjang tahun 2018, Lembaga Kaunselor telah menganjurkan lima (5) bengkel berbentuk teori dan amali untuk mempertingkatkan kemahiran kaunselor dan menganjurkan dua (2) seminar tentang kesedaran masalah kesihatan mental di peringkat kebangsaan iaitu di Sabah dan Putrajaya pada September dan Oktober 2018. Program ini dilaksanakan dengan kerjasama rakan strategik antaranya IPT Awam, Jabatan Pendidikan Negeri dan NGO.

Bulan ini pula merupakan Bulan Kaunseling Kebangsaan Tahun 2018 bertemakan “Perkhidmatan Kaunseling Profesional Pemangkin Kesejahteraan Masyarakat” sebagai hasrat Kerajaan untuk meningkatkan kesedaran masyarakat mengenai kewujudan kaunselor dan kepentingan perkhidmatan kaunseling profesional kepada masyarakat.

Pada 1 Oktober 2018 juga, saya telah melancarkan ‘Garis Panduan Perkhidmatan Kaunseling Keluarga dan Perkahwinan’ yang telah

SOALAN NO. 2

dibangunkan oleh Lembaga Kaunselor. Garis panduan ini boleh dijadikan rujukan untuk mengendalikan isu dalam keluarga seperti penderaan, keganasan rumah tangga, penceraian, pengabaian dan sebagainya.

SOALAN (3)

PEMBERITAHUAN PERTANYAAN DEWAN RAKYAT, PARLIMEN MALAYSIA

PERTANYAAN : LISAN

TARIKH : 15 OKTOBER 2018
[ISNIN]

DARIPADA : TUAN HASSAN BIN ABDUL KARIM
[PASIR GUDANG]

SOALAN :-

Tuan Hassan Bin Abdul Karim [Pasir Gudang] minta **MENTERI HAL EHWAL EKONOMI** menyatakan apakah benar Aliran Tunai (*Cash Flow*) FELDA hampir kosong. Apakah langkah-langkah yang Kerajaan akan ambil untuk memastikan nasib peneroka-peneroka FELDA terbela.

SOALAN (3)

JAWAPAN :

Tuan Yang di-Pertua,

Untuk makluman Ahli Yang Berhormat, pada masa ini FELDA sedang menghadapi masalah kedudukan aliran tunai yang amat kritikal berikutan terdapat pinjaman dengan institusi-institusi kewangan yang berbaki sebanyak RM8.0 bilion sehingga Jun 2018. Selain itu, harga minyak sawit mentah (CPO) yang rendah juga merupakan salah satu faktor yang memberi kesan kepada kedudukan aliran tunai FELDA yang semakin berkurangan.

Maka, pelan pemulihan kedudukan aliran tunai FELDA merupakan salah satu pelan jangka panjang yang sedang diberikan tumpuan oleh Lembaga Pengarah dan Pengurusan FELDA yang baharu dilantik pada Julai 2018 dan perkara ini telahpun dimulakan dengan mengadakan perjumpaan bersama beberapa institusi kewangan untuk menstrukturkan semula pinjaman FELDA. Dengan kaedah ini, FELDA dijangka dapat mengurangkan 15% baki pinjaman kepada RM6.8 billion pada akhir tahun 2018.

Selain itu, FELDA juga sedang dalam rangka untuk melihat keperluan menjual aset-aset yang bukan strategik seperti harta tanah di London, Sarawak dan Sabah yang dibeli dengan kos sebanyak RM2.2 bilion. Kaedah ini dapat menampung sebahagian daripada komitmen FELDA kepada 112,635 peneroka. Dengan kaedah-kaedah yang dilaksanakan seperti di atas, FELDA dijangka dapat memulihkan kedudukan aliran tunai FELDA dalam tempoh dua (2) tahun yang akan datang.

Dalam dewan yang mulia ini, Kerajaan ingin memberikan komitmen untuk memulihkan FELDA secepat mungkin demi kesejahteraan peneroka-peneroka FELDA selaras dengan matlamat penubuhan FELDA di bawah Akta Kemajuan Tanah 1956.

Isu dan langkah dalam pemulihan pengurusan kewangan dan tadbir urus FELDA akan dibentangkan secara terperinci dalam Kertas Putih FELDA yang pada peringkat akhir dan akan dibentangkan dalam sidang Parlimen kali ini. Dengan langkah ini Kerajaan percaya kedudukan sebenar agensi ini dan langkah pemulihannya akan dapat dikenal pasti dan dapat diambil perhatian oleh Ahli-Ahli Yang Berhormat.

Seterusnya ini akan membantu Kerajaan sedang merangka pelan tindakan pemulihan menyeluruh yang bersesuaian dan memberi manfaat langsung kepada FELDA dan warga peneroka FELDA.

Sekian, terima kasih.
15 Oktober 2018

Kementerian Hal Ehwal Ekonomi

PEMBERITAHUAN PERTANYAAN

DEWAN RAKYAT, MALAYSIA

**DARIPADA : Y.B. DATUK SERI ISMAIL SABRI BIN YAAKOB
(BERA)**

PERTANYAAN : LISAN

TARIKH : 15.10.2018

Y.B. DATUK SERI ISMAIL SABRI BIN YAAKOB [BERA] minta **MENTERI KEWANGAN** menyatakan berapakah jumlah pengurangan hasil pendapatan Kerajaan apabila GST dihapuskan dan apakah strategi Kerajaan untuk menampung semula kekurangan hasil pendapatan tersebut.

JAWAPAN

Tuan Yang di-Pertua,

1. Kerajaan Persekutuan telah melaksanakan kembali sistem Cukai Jualan dan Cukai Perkhidmatan (SST) pada 1 September 2018 bagi menggantikan Cukai Barang dan Perkhidmatan (GST). Sehubungan itu, hasil Kerajaan dianggar berkurang sebanyak RM21 bilion bagi

tahun 2018. Anggaran kutipan SST bagi tahun ini untuk tempoh September sehingga Disember 2018 adalah sebanyak RM4 bilion. Oleh itu, kehilangan hasil cukai berasaskan kepenggunaan bersih (*net impact*) adalah berjumlah RM17 bilion bagi tahun 2018. Sebahagian daripada pengurangan kutipan GST tersebut akan diimbangi oleh tambahan hasil seperti berikut:

- i. tambahan hasil berkaitan petroleum yang dijangka berjumlah RM5.4 bilion berikutan peningkatan harga minyak mentah purata kepada USD70 setong (Brent) berbanding andaian USD52 setong yang diguna pakai dalam Bajet 2018.
- ii. tambahan dividen yang dianggar sebanyak RM5 bilion daripada syarikat berkaitan kerajaan (GLCs) termasuk PETRONAS dan Khazanah Nasional Berhad.

2. Untuk makluman Yang Berhormat, tambahan dividen ini adalah *one off* selaras dengan peningkatan harga minyak mentah dunia pada tahun 2018 berbanding andaian yang digunakan dalam Bajet 2018. Meskipun harga minyak mentah dunia berada di sekitar USD70 setong, peratusan hasil berkaitan petroleum kepada KDNK hanyalah di sekitar 3.3% berbanding 9.2% pada tahun 2009 di mana pada tahun tersebut harga minyak mentah dunia adalah pada paras USD62

setong. Ini menunjukkan bahawa Kerajaan telah mengurangkan kebergantungan kepada hasil berkaitan petroleum.

3. Di samping itu, antara langkah-langkah lain bagi meningkatkan hasil Kerajaan Persekutuan adalah menerusi aktiviti audit dan siasatan yang berterusan oleh Lembaga Hasil Dalam Negeri dan Jabatan Kastam Diraja Malaysia bagi meningkatkan pematuhan cukai dan mengurangkan jurang cukai. Kerajaan juga akan meneroka sumber hasil baharu terutama daripada aktiviti transaksi atas talian dan menyemak semula insentif cukai bagi memastikan impak yang minima kepada pengurangan hasil namun menjana aktiviti ekonomi.

4. Kerajaan juga telah melaksanakan langkah rasionalisasi perbelanjaan dengan menyusun semula keutamaan perbelanjaan serta mengkaji, menangguh dan merunding semula projek-projek berkos tinggi. Selain itu, Kerajaan turut merasionalisasikan fungsi jabatan, program dan projek bagi mengelakkan pertindihan serta meningkatkan tadbir urus perolehan supaya lebih cekap dan telus. Langkah ini dijangka memberi penjimatan keseluruhan perbelanjaan sebanyak RM10 bilion. Namun begitu, Kerajaan tetap komited terhadap manifesto Pakatan Harapan yang mana antara terasnya adalah untuk mengurangkan beban kos sara hidup rakyat. Dalam hal

ini, harga petrol RON95 telah distabilkan pada RM2.20 seliter dan diesel pada RM2.18 seliter di mana langkah ini akan memberi penjimatan kepada rakyat Malaysia dalam bentuk subsidi sebanyak RM3 bilion sehingga Disember tahun ini. Di samping itu, bantuan istimewa juga telah diberikan kepada setiap penjawat awam gred 41 dan ke bawah serta pesara jawatan awam yang melibatkan perbelanjaan sebanyak kira-kira RM700 juta. Di sini, Kerajaan akan terus memastikan pertumbuhan ekonomi terus kukuh dalam mengimbangi kedudukan kewangan dan paras hutang.

PEMBERITAHUAN PERTANYAAN

DEWAN RAKYAT, MALAYSIA

**DARIPADA : Y.B.TUAN AHMAD FAIZAL BIN DATO' AZUMU
(TAMBUN)**

PERTANYAAN : LISAN

TARIKH : 15.10.2018

Y.B.TUAN AHMAD FAIZAL BIN DATO' AZUMU [TAMBUN] minta **MENTERI KEWANGAN** menyatakan adakah Kerajaan Pusat akan memperkenalkan insentif-insentif cukai bagi pemaju-pemaju kawasan perindustrian bagi merancakkan semula pembangunan ekonomi dan kemasukan pelaburan baru.

JAWAPAN

Tuan Yang di-Pertua,

Untuk makluman Ahli Yang Berhormat, melalui pengumuman Bajet 2015 sebelum ini, Kerajaan telah memperkenalkan insentif pengurusan kawasan perindustrian bertujuan untuk membentuk eko sistem yang menyokong pembangunan industri di Malaysia. Bagi

memastikan infrastruktur dapat diselenggara dengan sistematik oleh pihak pengurus kawasan perindustrian, Kerajaan telah menyediakan pengecualian cukai pendapatan sebanyak 100% untuk tempoh 5 tahun kepada syarikat yang menjalankan aktiviti yang layak dalam taman perindustrian. Insentif ini diberi kepada syarikat yang membuat permohonan kepada MIDA bagi tempoh 1 Januari 2015 hingga 31 Disember 2017.

Walau bagaimanapun, sehingga tarikh tamat permohonan pengecualian cukai tersebut, tiada sebarang permohonan yang diterima oleh pihak MIDA untuk diberi pertimbangan walaupun kriteria kelayakan insentif ini telah dilonggarkan kepada pemohon-pemohon insentif.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA,
PARLIMEN KEEMPAT BELAS**

SOALAN NO.6

Minta **MENTERI PEMBANGUNAN USAHAWAN** menyatakan dasar dan inisiatif serta prospek bagi membangunkan usahawan Bumiputera.

JAWAPAN

Tuan Yang di-Pertua,

Kementerian Pembangunan Usahawan (MED) telah dipertanggungjawabkan untuk membangunkan semua usahawan di Malaysia secara komprehensif dan holistik termasuk usahawan Bumiputera dalam pelbagai sektor.

Kementerian telah menetapkan dasar dan hala tuju pembangunan usahawan selaras dengan visi dan misi Kementerian. Ini merangkumi melebarkan bidang keusahawanan dari setiap lapisan geopolitik serta melahirkan usahawan yang berintegriti, berdaya maju dan kompetitif yang dapat bersaing bukan sahaja di peringkat tempatan malahan sehingga ke peringkat global.

Antara inisiatif dan strategi yang dirancang bagi membangunkan usahawan Bumiputera adalah seperti berikut:

- (i) meningkatkan pemilikan ekuiti Bumiputera dengan lebih efektif;
- (ii) meningkatkan kapasiti dan daya saing PKS melalui program *Groom Big* dan Satu Daerah Satu Industri (SDSI), Skim Anjakan Usahawan (SAU) dan *Bumiputera Enterprise Enhancement Programme* (BEEP);
- (iii) meningkatkan potensi vendor Bumiputera tempatan yang bersaing di peringkat global melalui Program Pembangunan Vendor (*Vendor Development Programme* – VDP);

- (iv) menggalakkan penglibatan belia Bumiputera dalam bidang keusahawanan, antaranya melalui Program Tunas Usahawan Belia Bumiputera (TUBE) dan Program Jom Jadi Perintis (JUMPER); dan
- (v) mengadakan sesi libat urus dengan usahawan-usahawan tempatan diperingkat akar umbi melalui platform yang baharu diwujudkan oleh MED seperti *Entrepreneur Development Advisory Council* (EDAC) dan Konvensyen Usahawan Bumiputera. Pada masa yang sama, fasilitasi dan khidmat nasihat dikendalikan melalui Pusat Sehenti Keusahawanan (PSK) yang telah dilancarkan oleh Kementerian pada 2 Oktober 2018.

Kementerian juga sedang merancang memperbanyakkan program-program berpakej kepada semua usahawan. Ini merangkumi penyediaan latihan keusahawanan, penyediaan bantuan premis, pengwujudan peluang peluang perniagaan, bantuan teknikal dan pemasaran dan pembiayaan perniagaan kepada golongan usahawan dari semua kaum agar semua usahawan-usahawan di Malaysia terus berdaya maju, berdaya saing dan berdaya tahan.

Sekian, terima kasih.

**PEMBERITAHU PERTANYAAN LISAN DEWAN RAKYAT
MESYUARAT KEDUA, PENGGAL PERTAMA
PARLIMEN KEEMPAT BELAS**

PERTANYAAN : LISAN

**DARIPADA : TUAN AHMAD FAHMI BIN MOHAMED FADZIL
[LEMBAH PANTAI]**

TARIKH : 15 OKTOBER 2018

SOALAN NO. 7

Minta **MENTERI PENDIDIKAN** menyatakan perancangan Kerajaan untuk memastikan Pusat Perubatan Universiti Malaya (PPUM) mempunyai dana yang mencukupi untuk terus memberi perkhidmatan terbaik terutama kepada golongan miskin bandar di Lembah Pantai dan sekitarnya.

JAWAPAN

Tuan Yang di-Pertua,

Untuk makluman Ahli Yang Berhormat, objektif utama Hospital Pengajar Universiti (HPU) adalah untuk menyediakan latihan klinikal, pengajaran dan pembelajaran serta penyelidikan bagi memastikan pelajar dilatih memberi khidmat perubatan yang terbaik di samping menyediakan ruang untuk mereka menjadi pakar. HPU juga turut memberikan perkhidmatan kesihatan kepada rakyat. Fungsi utama HPU ini menjadikan mereka berbeza dengan hospital-hospital Kerajaan yang lain di bawah Kementerian Kesihatan Malaysia (KKM).

Berbeza dengan hospital-hospital di bawah KKM, HPU ditubuhkan di bawah perlembagaan universiti dan menerima pakai pekeliling Kerajaan tertakluk kepada persetujuan Lembaga Pengarah Universiti. Pusat Perubatan Universiti Malaya (PPUM) adalah sebahagian daripada 4 buah HPU di Malaysia. Sebagai sebuah HPU, PPUM merupakan makmal pembelajaran bagi pelajar perubatan dan program yang berkaitan. Selain itu, PPUM juga mewujudkan Hospital Latihan Siswazah bagi tujuan latihan pegawai perubatan.

Bagi tahun 2018, Kerajaan telah memperuntukkan sebanyak RM400 Juta bagi membiayai perbelanjaan mengurus (PPUM). Selain itu juga, PPUM turut menerima peruntukan tambahan bagi perolehan ubat-ubatan dan alat guna habis pada 2018 sebanyak RM29,349,900.00.

Kementerian Pendidikan Malaysia turut menggariskan beberapa strategi dalam memantapkan kedudukan kewangan hospital pengajar bagi mengurangkan penggantungan kepada sumber Kerajaan. Salah satu strategi yang diperkenalkan adalah menggalakkan hospital pengajar untuk memperkuuhkan kewangan sendiri dengan mempelbagaikan sumber pendapatan dalaman tanpa menjelaskan kualiti perkhidmatan sedia ada disamping mengoptimumkan perbelanjaan operasi dan penambahbaikan proses kerja.

Soalan No:7

Justeru, PPUM telah melaksanakan beberapa strategi untuk menjana pendapatan sendiri merangkumi:

- (a) Penjualan sistem yang dibangunkan sendiri oleh PPUM kepada pihak luar. Setakat ini, Pusat Perubatan UIAM telah membeli sistem *i-pesakit* daripada PPUM;
- (b) Meningkatkan pendapatan melalui hasil sewaan dengan memaksimakan ruang niaga dan ruang pengiklanan;
- (c) Menawarkan perkhidmatan makmal kepada pihak-pihak yang memerlukan seperti hospital swasta dan lain-lain pihak yang berkenaan. Antara hospital swasta yang menggunakan perkhidmatan makmal PPUM adalah KPJ dan *Mahkota Medical Center*; dan
- (d) Menganjurkan program latihan yang berteraskan klinikal dan separa klinikal yang amat diperlukan oleh agensi luar.

Sehubungan itu, walaupun dalam keadaan pengurangan dana awam, PPUM mampu menjana sumber pendapatan tambahan dan terus memberi perkhidmatan kepada bilangan pesakit yang dijangka akan meningkat sebanyak 3 peratus pada 2018 berbanding tahun 2017.

Pada masa yang sama, PPUM juga tetap memberikan khidmat komuniti kepada golongan miskin bandar khususnya di kawasan Lembah Pantai. Iaitu di kawasan Ahli Yang Berhormat yang bertanya. Di antaranya menjalankan Program CSR bersama komuniti Lembah Pantai termasuk program derma darah, khidmat rawatan susulan, program kesedaran mengenai kepentingan kesihatan khususnya tahap kesihatan mental dan rawatan seperti diabetis, tibi, denggi dan kawalan jangkitan penyakit. PPUM juga sedang merancang untuk mewujudkan sistem rawatan satelit untuk memudahkan pesakit golongan berpendapatan rendah mendapat rawatan di komuniti tanpa perlu ke PPUM. Buat permulaan kawasan yang dikenalpasti untuk menerima kemudahan ini adalah komuniti di Lembah Pantai dan Taman Medan. Inisiatif ini akan dimulakan pada tahun 2019.

PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA
PARLIMEN KEEMPAT BELAS
15 OKTOBER HINGGA 11 DISEMBER 2018

PERTANYAAN : LISAN

**DARIPADA : DATUK SERI DR. ADHAM BIN BABA
[TENGGARA]**

TARIKH : 15 OKTOBER 2018 (ISNIN)

SOALAN :

Minta **MENTERI INDUSTRI UTAMA** menyatakan adakah Malaysia masih lagi mengetuai inisiatif bersama negara-negara pengeluar lain kelapa sawit dunia dalam mengetengahkan kemampunan dalam pengeluaran produk sawit dan mengatasi persepsi negatif yang wujud terhadap industri ini.

JAWAPAN :

Tuan Yang di-Pertua,

1. Malaysia pada ketika ini mengetuai satu gabungan kerjasama bersama Indonesia menerusi Majlis Negara-Negara Pengeluar Minyak Sawit (*Council of Palm Oil Producing Countries* atau CPOPC). Kerjasama ini adalah untuk memantapkan lagi amalan persekitaran mampan, pengurusan bekalan, aktiviti promosi dan pembangunan pekebun-pekebun kecil. Dalam hal ini, Kerajaan telah merangka beberapa strategi bersama dengan Indonesia untuk mencari kaedah-kaedah yang bersesuaian untuk mengatasi persepsi negatif yang wujud ketika ini termasuk mengadakan misi bersama ke Kesatuan Eropah (EU).
2. Melalui CPOPC juga, Kerajaan akan terus komited untuk memastikan semua eksport minyak sawit dan produk-produk berasaskan sawit adalah dari sumber yang mampan yang menepati standard pensijilan Minyak Sawit Mampan Malaysia (MSPO) menjelang Disember 2019.

Sekian, terima kasih.

SOALAN NO: 9

PEMBERITAHUAN PERTANYAAN BAGI JAWAPAN LISAN
MESYUARAT KEDUA PENGGAL PERTAMA,
PARLIMEN KEEMPAT BELAS,
MAJLIS MESYUARAT DEWAN RAKYAT

PERTANYAAN : LISAN

DARIPADA : YB TUAN KHOO POAY TIONG

TARIKH : 15 OKTOBER 2018

SOALAN :

Tuan Khoo Poay Tiong [Kota Melaka] minta **MENTERI TENAGA MANUSIA** menyatakan apakah definisi 'pekerja mahir' dalam penentuan levi RM10,000 terhadap pekerja mahir yang telah bekerja 10 tahun atau lebih di Malaysia, dan apakah sebab dan implikasi dasar ini terhadap ekonomi dan sumber manusia negara.

PR-1412-L02239

JAWAPAN

Tuan Yang Di Pertua,

Pekerja mahir yang dimaksudkan dalam penentuan levi RM10,000 merujuk kepada pekerja yang mempunyai pengalaman dan kecekapan yang mendalam dalam pekerjaan yang telah dilaksanakannya. Ini memandangkan pekerja asing tersebut berkhidmat 10 tahun di Malaysia dengan majikan yang mengajikannya. Objektif utama pelaksanaan dasar ini adalah untuk membolehkan majikan mengekalkan pekerja asing yang telah pun mempunyai kemahiran tinggi khususnya dalam sektor-sektor tertentu seperti pembinaan dan perkilangan. Pelaksanaan dasar ini juga dijangka akan meningkatkan produktiviti dan daya saing industri serta memberi pulangan yang tinggi kepada majikan.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA,
PARLIMEN KEEMPAT BELAS**

PERTANYAAN : LISAN
DARIPADA : DATO' DR. NORAINI AHMAD
[PARIT SULONG]
TARIKH SOALAN : 15 OKTOBER 2018

SOALAN NO.10

Minta **MENTERI PEMBANGUNAN USAHAWAN** menyatakan apakah kerelevanlangkah yang dicadangkan pihak Kementerian yang ingin mengurangkan bantuan dan geran percuma kepada para usahawan di negara ini.

JAWAPAN

Tuan Yang Dipertua,

Kementerian Pembangunan Usahawan (MED) bercadang untuk mengurangkan peruntukan dan geran percuma yang disalurkan kepada para usahawan di bawah Bajet 2019. Cadangan tersebut masih dalam peringkat perbincangan, di mana Kementerian akan mengkaji semula segala bentuk bantuan dan geran yang diberikan. Langkah ini adalah bagi mengurangkan bebanan kewangan Kerajaan. Namun begitu, bantuan akan tetap diteruskan kepada golongan sasar berkelayakan dan mempunyai merit serta golongan usahawan yang berdaya saing dan berani menghadapi risiko untuk membangunkan perniagaan.

Bentuk bantuan yang akan diberikan akan lebih berbentuk pinjaman mudah atau *soft loan*, dengan izin, kepada para usahawan untuk membayar balik tertakluk kepada syarat-syarat yang spesifik. Kerajaan juga komited untuk terus membantu usahawan daripada segi pembangunan kapasiti melalui kerjasama dengan institusi latihan berkaitan untuk membangunkan latihan yang bersesuai dengan keusahawanan, mempergiatkan program inkubator keusahawanan sedia ada di institusi-institusi pengajian tinggi, program *coaching* serta *mentoring* dan sebagainya bagi memperkasakan usahawan-usahawan tempatan.

Kementerian juga akan meneruskan program-program pembangunan usahawan yang dilaksanakan melalui agensi-agensi seperti SME Corp Malaysia dan TEKUN.

Sekian, terima kasih

DEWAN RAKYAT
PEMBERITAHUAN PERTANYAAN
MESYUARAT KEDUA, PENGGAL PERTAMA
PARLIMEN KEEMPAT BELAS (2018)

PERTANYAAN : LISAN

TARIKH : 15 OKTOBER 2018 (ISNIN)

DARIPADA : TUAN LIM KIT SIANG
[ISKANDAR PUTERI]

SOALAN : 11

Tuan Lim Kit Siang [Iskandar Puteri] minta **PERDANA MENTERI** menyatakan bilakah Kementerian berhasrat untuk membentangkan Laporan Akhir Majlis Penasihat Kerajaan (CEP) kepada Dewan Rakyat supaya dapat dibahaskan dengan lebih lanjut.

JAWAPAN: **YB DATUK LIEW VUI KEONG**
MENTERI DI JABATAN PERDANA MENTERI

Tuan Yang di-Pertua,

2. Ahli-Ahli Yang Berhormat, seperti mana Ahli Yang Berhormat sedia maklum, Majlis Penasihat Kerajaan atau Council of Eminent Persons (CEP) telah diumumkan penubuhannya pada 12 Mei 2018 dan mereka telah tamat melaksanakan tugas pada 19 Ogos 2018. Matlamat utama penubuhan Majis ini adalah untuk menasihatkan Kerajaan dalam

NO. SOALAN: 11

bidang ekonomi, kewangan serta bidang-bidang lain yang perlu diberi perhatian mengikut keadaan dari semasa ke semasa.

3. Pihak Kerajaan telah pun menerima secara berperingkat laporan cadangan penambahbaikan yang disyorkan oleh CEP. Walau bagaimanapun, seperti mana yang pernah dimaklumkan di dalam sidang dewan yang mulia ini, sama ada pandangan mereka diterima atau tidak tertakluk kepada pertimbangan Jemaah Menteri atau Parlimen. CEP hanya berperanan sebagai badan penasihat yang tidak mempunyai kuasa atau peruntukan di bawah Perlembagaan ataupun Undang-Undang Negara. Ini bermakna, Kerajaan sama sekali tidak terikat untuk menerima cadangan-cadangan yang dikemukakan oleh CEP.
4. Memandangkan laporan yang dikemukakan masih lagi dalam pertimbangan Kerajaan, cadangan Ahli Yang Berhormat untuk laporan tersebut didedahkan kepada umum akan hanya diputuskan setelah laporan-laporan tersebut diteliti.
5. Apa yang lebih penting, Kerajaan Pakatan Harapan akan sentiasa bersikap peka dan prihatin terhadap semua perkara atau pandangan yang diberikan dalam laporan tersebut.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA,
PARLIMEN KEEMPAT BELAS**

PERTANYAAN : LISAN

**DARIPADA : TUAN KHAIRY JAMALUDDIN
[REMBAU]**

TARIKH : 15 OKTOBER 2018 (ISNIN)

SOALAN NO.12

Minta **MENTERI HAL EHWAL EKONOMI** menyatakan adakah pihak Kementerian telah mengambil kira kos masa hadapan susulan keputusan penangguhan pembinaan projek kereta api laju (HSR) Malaysia-Singapura sehingga tahun 2020 serta berapakah jangkaan kos pembinaan tersebut selepas mengambil kira faktor inflasi pada tahun 2020.

JAWAPAN

Yang di-Pertua,

Untuk makluman Ahli Yang Berhormat,

Bagi projek Keretapi Laju Kuala Lumpur – Singapura (HSR), Kerajaan telah memutuskan untuk menangguhkan projek ini sehingga 31 Mei 2020. Projek HSR terpaksa ditangguhkan kerana ianya melibatkan komitmen kewangan Kerajaan yang tinggi dan kedudukan kewangan negara pada masa ini tidak mengizinkan.

Bagi membantu Kerajaan dalam mempertimbangkan beberapa opsyen untuk mengurangkan kos projek, satu kajian akan dilaksanakan dalam tempoh penangguhan tersebut. Ini termasuklah opsyen untuk penyediaan perkhidmatan keretapi ekspres sahaja, pengurangan bilangan stesen, penjajaran semula laluan landasan, perubahan reka bentuk kejuruteraan ataupun pembatalan projek. Kos sebenar hanya akan dapat ditentukan setelah Kerajaan membuat keputusan mengenai opsyen yang hendak dipilih sebelum rundingan semula dengan pihak Singapura diadakan.

Projek-projek yang diteruskan semula selepas tamat tempoh penangguhan perlu mengambil kira kos inflasi. Memandangkan projek HSR sedang dikaji semula, maka dijangkakan kos projek yang baharu akan hanya diketahui selepas kajian tersebut selesai dilaksanakan.

Sekian, terima kasih.

15 Oktober 2018

Kementerian Hal Ehwal Ekonomi

PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA
PARLIMEN KEEMPAT BELAS
15 OKTOBER HINGGA 11 DISEMBER 2018

PERTANYAAN : LISAN

DARIPADA : TUAN WONG LING BIU
[SARIKEI]

TARIKH : 15 OKTOBER 2018 (ISNIN)

SOALAN :

Minta **MENTERI INDUSTRI UTAMA** menyatakan adakah konflik perdagangan di antara United States of Amerika dan China akan memberikan manfaat ke atas jualan minyak sawit Malaysia ke China.

JAWAPAN :

Tuan Yang di-Pertua,

1. Konflik perdagangan antara Amerika Syarikat dan China telah memberi manfaat ke atas permintaan minyak sawit Malaysia ke China. Konflik ini telah menyebabkan bekalan minyak kacang soya di pasaran tempatan China berkurangan untuk memenuhi permintaan di negara tersebut. Akibatnya, permintaan ke atas minyak sawit yang merupakan barang gantian kepada minyak soya di China meningkat. Berdasarkan rekod, eksport produk minyak sawit Malaysia ke negara China telah meningkat sebanyak 9.3% dari 1.65 juta tan yang direkodkan pada Januari hingga Ogos 2017 kepada 1.81 juta tan untuk tempoh yang sama pada tahun 2018.
2. Manfaat positif turut direkodkan bagi pasaran dedak isirung sawit Malaysia ke China. Ini kerana permintaan dedak isirung sawit telah meningkat bagi menggantikan hampas kacang soya untuk kegunaan industri makanan ternakan. Eksport dedak isirung sawit Malaysia ke China telah meningkat sebanyak 57.0% dari 81,039 tan pada Januari hingga Ogos 2017 kepada 127,195 tan untuk tempoh yang sama pada tahun 2018.
3. Negara China merupakan pengimpor terbesar kacang soya dari Amerika Syarikat. Dijangkakan jumlah import kacang soya dari Amerika Syarikat oleh negara China akan berkurangan kerana ia akan beralih kepada pengeksport kacang soya lain seperti Brazil. Walau bagaimanapun, bekalan kacang soya dari Brazil tidak dapat memenuhi jumlah permintaan yang besar oleh China. Oleh itu, China perlu mengimport produk-produk lain termasuklah minyak sawit dan dedak isirung sawit untuk kegunaan tempatan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA,
PARLIMEN KEEMPAT BELAS**

PERTANYAAN : JAWAB LISAN

DARIPADA : YB DATO' SRI HJ IKMAL HISHAM BIN ABDUL AZIZ (TANAH MERAH)

TARIKH : 15 OKTOBER 2018

SOALAN : 14

Dato' Sri Ikmal Hisham bin Abdul Aziz [Tanah Merah] minta MENTERI DALAM NEGERI menyatakan secara terperinci statistik tangkapan Ops Mega 3.0 yang dilancarkan sejak Julai lalu.

JAWAPAN

Tuan Yang Di Pertua,

Untuk makluman Ahli Yang Berhormat, bermula pada 1 Julai 2018 setelah tamatnya Program Penggajian dan Penempatan Semula Pendatang Asing Tanpa Izin (PATI) atau Program *Rehiring*, Jabatan Imigresen Malaysia (JIM) telah melancarkan operasi penguatkuasaan secara besar-besaran (Ops Mega 3.0) yang bertujuan memburu pihak majikan dan PATI yang degil dan ingkar untuk mematuhi undang-undang dan peraturan di negara ini sebagai langkah memperkuuh aktiviti penguatkuasaan oleh Jabatan. Operasi penguatkuasaan ini akan dijalankan secara berterusan tanpa henti dalam memutuskan rantai kesalahan, termasuk bersama agensi penguatkuasa yang lain dan tindakan tegas akan dikenakan kepada majikan serta PATI yang ditangkap dalam operasi ini. Mulai 1 Julai 2018 hingga 4 Oktober 2018, JIM telah memeriksa 57,786 orang warganegara asing dan daripada jumlah tersebut seramai 14,696 orang PATI dan 382 orang majikan ditahan atas pelbagai kesalahan imigresen.

Daripada jumlah keseluruhan PATI yang ditahan, warga Indonesia telah mencatatkan tangkapan tertinggi iaitu seramai 4,829 orang, diikuti oleh warga Bangladesh seramai 3,350 orang, Myanmar seramai 1,303 orang, Filipina seramai 1,128 orang, Thailand seramai 1,084 orang, India seramai 871 orang dan bakinya sebanyak 2,131 adalah dari negara-negara lain.

PEMBERITAHUAN PERTANYAAN

DEWAN RAKYAT, MALAYSIA

**DARIPADA : Y.B. TUAN WONG HON WAI
(BUKIT BENDERA)**

PERTANYAAN : LISAN

TARIKH : 15.10.2018

Y.B. TUAN WONG HON WAI [BUKIT BENDERA] minta **MENTERI KEWANGAN** menyatakan langkah-langkah pentadbiran dan perundangan yang telah dijalankan dan dirancang untuk mengelakkan syarikat-syarikat GLC daripada melanggari Malaysian Code of Corporate Governance seperti kelewatan menfail penyata kewangan untuk beberapa tahun seperti PFI Sdn. Bhd. dan syarikat 1MDB Sdn. Bhd., National Feedlot Corp, Felda yang terjerumus dalam skandal kewangan.

JAWAPAN

Tuan Yang Dipertua,

Untuk makluman Yang Berhormat, *Malaysian Code of Corporate Governance* (MCCG) diwujudkan sebagai panduan kepada syarikat

untuk menerapkan amalan tadbir urus yang baik berdasarkan amalan-amalan terbaik di peringkat antarabangsa. MCCG mencerminkan prinsip-prinsip global dan amalan tadbir urus korporat terbaik yang menyokong penggunaan standard yang melebihi keperluan minimum seperti mana yang termaktub dalam undang-undang dan peraturan atau yang ditetapkan oleh Bursa Malaysia.

Pematuhan terhadap MCCG adalah secara sukarela memandangkan MCCG bukanlah satu jenis perundangan atau akta yang wajib dipatuhi oleh syarikat. Walau bagaimanapun, bagi syarikat tersenarai, mereka dikehendaki untuk menjelaskan dalam Laporan Tahunan kaedah pemakaian cadangan MCCG. Syarikat tersenarai dikehendaki untuk memberi penjelasan munasabah berhubung ketidakpatuhan kepada mana-mana cadangan MCCG.

Sungguhpun pemakaian MCCG tidak diwajibkan, penambahbaikan dan semakan semula ke atas MCCG telah dibuat dengan mengambil kira pindaan Akta Syarikat 2016, perubahan dinamik pasaran, pembangunan antarabangsa dan keperluan bagi menentu ukur dan meningkatkan keberkesanan kerangka kerja tadbir urus korporat secara berterusan.

Untuk makluman Yang Berhormat juga, semua syarikat yang ditubuhkan di Malaysia termasuk syarikat GLC digubal dan seterusnya tertakluk kepada Akta Syarikat. Keperluan bagi menyediakan Penyata Kewangan syarikat adalah sebagai mana dinyatakan dalam seksyen

258, Akta Syarikat di mana pengarah syarikat hendaklah memastikan supaya Penyata Kewangan syarikat disediakan dan mana-mana pengarah syarikat yang melanggar seksyen ini boleh, apabila disabitkan, didenda tidak melebihi lima ratus ribu ringgit atau dipenjarakan selama tempoh tidak melebihi satu tahun atau kedua-duanya.

Manakala keperluan untuk memfailkan Penyata Kewangan syarikat dinyatakan dalam seksyen 259, Akta Syarikat yang mana pelanggaran seksyen ini adalah suatu kesalahan dan boleh, apabila disabitkan, didenda tidak melebihi lima puluh ribu ringgit dan, dalam hal suatu kesalahan yang berterusan, denda selanjutnya tidak melebihi satu ribu ringgit bagi setiap hari kesalahan itu berterusan selepas sabitan.

Bagi syarikat 1MDB dan National Feedlot Corp, kegagalan syarikat untuk memfailkan penyata kewangan syarikat adalah disebabkan beberapa masalah berkaitan dengan tadbir urus dan juga tindakan perundangan yang dijalankan ke atas kedua-dua syarikat. Atas faktor berkenaan, operasi dan aktiviti syarikat telah dihentikan dan susulan daripada itu, tiada penyata kewangan yang disediakan. Pada masa ini, kedua-dua syarikat ini adalah dalam kedudukan dormant.

Bagi syarikat PFI Sdn. Bhd., penyata kewangan syarikat sehingga

tahun 2016 telah pun difaikkan di Suruhanjaya Syarikat Malaysia, manakala bagi tahun 2017 akan difaikkan selepas Mesyuarat Agung Tahunan dilaksanakan. Berdasarkan rekod Kementerian Kewangan, tiada kelewatan dalam memfaikkan penyata kewangan bagi FELDA.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA,
PARLIMEN KEEMPAT BELAS**

PERTANYAAN : LISAN
DARIPADA : DATUK DR. HAJI ABD. LATIFF BIN AHMAD
[MERSING]
TARIKH : 15 OKTOBER 2018 (RABU)

SOALAN NO. 16

Minta **MENTERI KESIHATAN** menyatakan:

- a) apakah rasional atau justifikasi Kementerian membuat keputusan menutup sebanyak 33 buah Klinik 1Malaysia ; dan
- b) apakah kemudahan tambahan yang disediakan setelah klinik 1Malaysia dijenamakan sebagai Klinik Komuniti.

JAWAPAN

Yang di-Pertua,

Tujuan asal penubuhan Klinik 1Malaysia (K1M) adalah untuk menyediakan perkhidmatan rawatan ringan kepada masyarakat terutamanya di kawasan dengan penduduk yang padat serta berpendapatan rendah. Namun begitu, semenjak penubuhannya, Kementerian mendapat terdapat fasiliti K1M yang tidak kos efektif seperti berikut:

1. Purata Kedatangan Harian kurang 40 pesakit sehari
2. Mempunyai fasiliti kesihatan Kerajaan lain dalam lingkungan 5km
3. Tidak terletak di premis PPR (perumahan rakyat)
4. Mendapat persetujuan Jabatan Kesihatan Negeri masing-masing.

Selepas mendapat persetujuan Kabinet, proses penutupan fasiliti K1M tersebut adalah secara *soft landing* iaitu sehingga tamatnya tempoh sewaan premis masing-masing. Anggota di fasiliti terlibat akan ditempatkan semula (*redeployment*) ke Klinik Kesihatan Induk masing-masing atau ke fasiliti yang dinaik taraf.

Perlu diperjelaskan bahawa transformasi perkhidmatan K1M kepada Klinik Komuniti adalah bertujuan untuk memberi nilai tambah kepada perkhidmatan sedia ada, selain menyusun keperluan dan pengurusan sumber.

Pelan transformasi ini mempunyai 3 komponen utama iaitu:

1. **Menambah nilai K1M kepada Klinik Komuniti dengan:**
 - i) **Fokus perkhidmatan** yang disediakan adalah menjurus kepada **Rawatan Pesakit Luar** fokus kepada rawatan dan kawalan penyakit tidak berjangkit serta **Kecemasan Asas**.
 - ii) **Penempatan Pegawai Perubatan dan Pegawai Farmasi** di **fasiliti terpilih secara berperingkat**.

2. **Naik taraf** fasiliti yang sesuai kepada Klinik Kesihatan.
3. **Penamatan** perkhidmatan fasiliti yang tidak kos efektif.

Untuk itu, daripada 347 buah K1M semasa, sejumlah **293** akan dijenama semula sebagai **Klinik Komuniti**; 20 buah akan dinaik taraf kepada Klinik Kesihatan, manakala 34 yang lain bakal ditutup secara berperingkat.

**PEMBERITAHU PERTANYAAN LISAN DEWAN RAKYAT
MESYUARAT KEDUA, PENGGAL PERTAMA
PARLIMEN KEEMPAT BELAS**

PERTANYAAN : LISAN

DARIPADA : DATO' SERI DR. SANTHARA [SEGAMAT]

TARIKH : 15 OKTOBER 2018 (ISNIN)

SOALAN NO.17

Minta **MENTERI PENDIDIKAN** menyatakan :-

- (a) apakah perancangan Kementerian untuk memastikan semua pelajar yang mendapat CGPA 3.8 ke atas untuk diberikan penempatan secara automatik ke program matrikulasi; dan
- (b) statistik jumlah pengambilan bagi tahun 2018 dan 2019 berserta pecahan yang TIDAK BERJAYA mengikut kawasan dan kaum serta jantina.

JAWAPAN

Tuan Yang di-Pertua,

- (a) Untuk makluman Ahli Yang Berhormat, pemilihan bagi kemasukan ke Program Matrikulasi Kementerian Pendidikan Malaysia (KPM) tidak menggunakan Purata Nilai Gred Kumulatif (PNGK) sebaliknya berdasarkan keputusan peperiksaan Sijil Pelajaran Malaysia (SPM).

Pemilihan lepasan SPM ke Program Matrikulasi KPM dilaksanakan mengikut meritokrasi berdasarkan pengiraan merit. Pengiraan merit adalah berdasarkan pencapaian pelajar dengan mengambil kira gabungan 90 peratus pencapaian akademik dan 10 peratus kokurikulum. 90 peratus skor merit diperoleh daripada kombinasi empat mata pelajaran SPM yang ditetapkan, manakala 10 peratus skor merit diperoleh daripada markah kokurikulum pelajar di sekolah. Ini bermakna pelajar bukan sahaja perlu cemerlang dalam akademik tetapi juga perlu cemerlang dalam kokurikulum.

Tujuan asal program Matrikulasi Kementerian Pendidikan Malaysia (KPM) adalah persediaan diwujudkan pada 10 Mac 1999 bagi pelajar bumiputera untuk melayakkan mereka melanjutkan pengajian ke peringkat ijazah pertama dalam bidang sains, teknologi dan profesional di universiti awam. Namun begitu, semenjak tahun 2003 program ini turut menerima kemasukan kuota 10 peratus pelajar bukan bumiputera.

- (b) Bagi sesi 2018/2019, Program Matrikulasi KPM mengambil 87 peratus pelajar bumiputera. Manakala 13 peratus lagi merupakan pelajar bukan bumiputera seperti perincian berikut:
1. kaum Cina sebanyak 4.91 peratus;
 2. kaum India sebanyak 7.57 peratus; dan
 3. kaum bukan bumiputera lain sebanyak 0.52 peratus.

Untuk makluman Ahli Yang Berhormat, 53.12 peratus pelajar bumiputera lepasan SPM dari seluruh negara yang memohon tetapi

NO SOALAN: 17

tidak ditawarkan ke Program Matrikulasi KPM pada sesi 2018/2019. Selebihnya iaitu sebanyak 46.88 peratus pelajar bukan bumiputera yang memohon, tidak ditawarkan ke program ini. Hal ini meliputi 30.80 peratus kaum Cina, 11.42 peratus kaum India dan 4.66 peratus bukan bumiputera yang lain. Lepasan SPM dari negeri Selangor, Johor, Perak dan Kedah merupakan calon yang paling banyak memohon. Manakala peratusan keseluruhan mengikut jantina adalah sebanyak 36.09 peratus bagi lelaki dan 63.91 peratus bagi perempuan.

RJM01

**PEMBERITAHU PERTANYAAN LISAN DEWAN RAKYAT
MESYUARAT KEDUA, PENGGAL PERTAMA
PARLIMEN KEEMPAT BELAS**

PERTANYAAN : LISAN

**DARIPADA : DATO' SRI HAJI FADILLAH BIN YUSOF
[PETRAJAYA]**

TARIKH : 15 OKTOBER 2018 (ISNIN)

SOALAN NO. 18

Minta **MENTERI PENDIDIKAN** menyatakan apakah status tawaran Kerajaan Sarawak kepada Kerajaan Persekutuan untuk memberi pinjaman RM1 bilion bagi membaiki sekolah daif di Sarawak.

JAWAPAN

Tuan Yang di-Pertua,

Tawaran pinjaman RM1 bilion oleh Kerajaan Negeri Sarawak kepada Kerajaan Persekutuan yang lalu untuk kerja pembinaan sekolah daif di Sarawak dibuat dalam mesyuarat yang dipengerusikan bersama oleh mantan YAB Timbalan Perdana Menteri dan YAB Ketua Menteri Sarawak pada September 2017 di Sarawak.

Untuk makluman Ahli Yang Berhormat, memandangkan urusan pembinaan sekolah ini adalah di bawah tanggungjawab Kerajaan Persekutuan, sejumlah peruntukan telah disediakan untuk tujuan tersebut. Kerajaan pada masa itu melalui pembentangan Bajet 2018 telah meluluskan peruntukan sebanyak RM2.5 bilion untuk membaiki sekolah daif bagi tahun 2018 hingga 2019 menggunakan peruntukan *Private Financing Initiative 2A* (PFI 2A). Peruntukan RM2.5 bilion ini diperuntukkan untuk dua (2) tahun iaitu RM1.25 bilion bagi tahun 2018 dan RM1.25 billion bagi tahun 2019. Bagi RM1.25 bilion tahun 2018, peruntukan untuk pembinaan sekolah daif di Semenanjung Malaysia (RM250 juta), Sabah (RM500 juta) dan Sarawak (RM500 juta).

Pada tahun 2018, sebanyak 394 buah sekolah daif di seluruh negara terlibat dalam projek pembinaan atau naik taraf yang merangkumi sebanyak 158 buah di Semenanjung Malaysia, 120 buah di Sabah dan 116 buah di Sarawak. Berdasarkan rekod pada 20 September 2018, prestasi pelaksanaan projek bagi negeri Sarawak menunjukkan 64 projek telah siap dan 52 projek masih dalam pelaksanaan yang dijangka siap pada Disember 2018. Pihak KPM terus melaksanakan pemantauan rapi dan memantapkan kerjasama dengan semua pihak termasuk kerajaan negeri bagi memastikan semua projek berjalan lancar.

PEMBERITAHUAN PERTANYAAN DEWAN RAKYAT

PERTANYAAN : JAWAB LISAN

**DARIPADA : YB DATUK WIRA HAJAH MAS
ERMIEYATI BINTI SAMSUDIN [MASJID
TANAH]**

TARIKH : 15 OKTOBER 2018 (ISNIN)

SOALAN : 19

PR-1412-L02769

**YB Datuk Wira Hajah Mas Ermieyati binti Samsudin [Masjid Tanah]
minta MENTERI KOMUNIKASI DAN MULTIMEDIA menyatakan
langkah proaktif Kementerian dalam membanteras kegiatan penipuan
online (scammer).**

JAWAPAN

Tuan Yang di-Pertua,

1. Untuk makluman Ahli Yang Berhormat, kegiatan penipuan amnya tertakluk di bawah Seksyen 420 Kanun Keseksaan di bawah bidang kuasa pihak Polis Diraja Malaysia (PDRM). Manakala, penguatkuasaan undang-undang dan peraturan berkaitan dengan urusan jual beli dalam talian adalah di bawah seliaan Kementerian Perdagangan Dalam Negeri dan Hal Ehwal Pengguna (KPDNHEP).
2. Pihak SKMM sentiasa memberi kerjasama dengan pihak PDRM dan KPDNHEP bagi menangani isu-isu berkaitan dengan penipuan dalam talian. Sekiranya sesuatu kes dirujuk secara bertulis oleh PDRM, KPDNHEP, Bank Negara Malaysia (BNM) atau mana-mana agensi penguatkuasaan yang lain, tindakan yang akan diambil oleh SKMM adalah dengan mengekang aktiviti sindiket penipuan ini dengan menyekat talian telefon dan laman sesawang yang

berkaitan. Selain itu, SKMM juga membantu siasatan dengan mengenal pasti suspek dengan menggunakan alamat *Internet Protocol*, dengan izin, dan bukti – bukti digital forensik yang ada.

3. **Macau Scam** adalah salah satu contoh penipuan dalam talian yang popular. Ianya merujuk kepada penipuan melalui telefon dimana modus operandinya adalah suspek/ sindiket yang menyamar sebagai pegawai daripada agensi perbankan atau penguatkuasaan (Bank Negara/ PDRM/ Kastam) bagi menjerat mangsa dengan menggunakan teknik ‘spoofing’ di mana pemanggil adalah dari nombor yang tertera di skrin. Individu yang menerima panggilan tersebut akan diyakinkan oleh suspek (pemanggil) bahawa mereka terlibat dengan satu dari perkara – perkara berikut:-
 - a) Tawaran hadiah;
 - b) Akaun digunakan oleh orang lain;
 - c) Hutang kad kredit;
 - d) Parcel;
 - e) Terlibat dengan kegiatan jenayah; dan
 - f) Tawaran barang lelongan kastam.
4. Selain daripada itu, terdapat modus operandi penipuan yang dibuat menggunakan Khidmat Pesanan Ringkas (SMS) atau Whatsapp yang akan memperdaya mangsa dengan menyatakan bahawa mangsa telah memenangi hadiah peraduan dan mangsa telah diminta untuk mendepositkan sejumlah wang sebagai syarat untuk mendapatkan hadiah tersebut. Mangsa akan ke bank dan akan depositkan wang seperti yang diarahkan oleh sindikit ke dalam akaun yang diberikan. Mangsa hanya menyedari bahawa dia tertipu apabila tidak menerima hadiah yang dijanjikan. Perkara ini menjadi lebih rumit apabila suspek menggunakan perkhidmatan VOIP (voice over IP) untuk menyembunyikan jejak mereka dari pihak berkuasa.
5. Pihak SKMM juga telah membangunkan sistem untuk digunakan oleh PDRM bagi permohonan berkaitan dengan maklumat yang boleh membantu siasatan polis. SKMM telah membentangkan cadangan pada pihak PDRM untuk menyediakan akses kepada

sistem aduan SKMM yang dikenali dengan RLA (Rujuk Lain Agensi) bagi membolehkan laporan polis yang diterima dirujuk kepada SKMM jika ia melibatkan bidang kuasa penguatkuasaan SKMM.

6. Terkini, bagi menangani permasalahan penipuan melalui penyamaran seperti jenayah Macau Scam, Penipuan 419 (419 Scam) dan seumpamanya, yang semakin menular pada ketika ini, satu *Taskforce* yang dianggotai pihak PDRM, MCMC dan BNM telah ditubuhkan. *Taskforce* ini diwujudkan bagi memperkasakan koordinasi seterusnya membolehkan gerak kerja pantas dalam menangani dan membanteras permasalahan penipuan. *Taskforce* ini turut beroperasi dengan kerjasama pihak penyedia perkhidmatan komunikasi serta pihak bank di Malaysia.
7. PDRM juga mencadangkan supaya syarikat-syarikat telekomunikasi untuk menaik taraf sistem mereka bagi membantu pihak polis untuk mengesan alamat Protokol Internet (IP) yang digunakan oleh penjenayah siber ini.
8. Syarikat-syarikat telekomunikasi sedang mengemas kini pangkalan data pelanggan prabayar untuk memastikan bahawa semua nombor yang aktif disahkan dan mengandungi maklumat terkini pengguna. Perkhidmatan nombor prabayar akan ditamatkan sekiranya pengguna gagal mengemaskini maklumat. Maklumat-maklumat ini akan disemak oleh Jabatan Pendaftaran Negara (JPN) yang bertujuan untuk mengeluarkan rekod pelanggan prabayar yang diragui.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA,
PARLIMEN KEEMPAT BELAS**

PERTANYAAN : LISAN

**DARIPADA : YB DATUK DR. JEFFREY GAPARI KITINGAN
[KENINGAU]**

TARIKH : 15 OKTOBER 2018 (ISNIN)

SOALAN NO.20

Minta **MENTERI HAL EHWAL EKONOMI** menyatakan:-

- (a) adakah Kerajaan Persekutuan masih akan membayar 20% royalti minyak (cash payment) menurut Petroleum Development Act 1974 berdasarkan pengeluaran kasar (gross production) atau tidak. Sekiranya tidak, apakah bayaran alternatifnya; dan
- (b) bilakah bayaran 20% royalti (cash payment) atau alternatifnya akan bermula dibayar kepada negeri-negeri pengeluar minyak. Bilakah Kerajaan akan mematuhi Item 3 Bahagian V Jadual ke-10 Perlembagaan Persekutuan dan membayar cukai eksport ke atas petroleum mengganti royalti minyak sehingga berjumlah besar 10% nilai ad valorem.

JAWAPAN

Yang di-Pertua,

Untuk makluman Ahli Yang Berhormat, dalam Mesyuarat Pertama, Penggal Pertama Parlimen Keempat Belas yang lalu semasa penggulungan perbahasan menjunjung kasih Titah Seri Paduka Baginda Yang Di-Pertuan Agong pada 1 Ogos 2018, saya telah menyatakan antara lain, secara panjang lebar mengenai bayaran tunai (*cash payment*) atau lebih dikenali sebagai royalti minyak dalam Dewan yang mulia ini.

Saya juga telah menyatakan bahawa Kerajaan bercadang untuk menubuhkan Jawatankuasa Khas Kabinet yang dianggotai oleh wakil-wakil daripada Semenanjung, Sabah dan Sarawak yang mempunyai kepakaran dalam hal-hal berkaitan bertujuan untuk menyemak, mengkaji dan menambahbaik secara adil Perjanjian Malaysia 1963.

Sukacita dimaklumkan bahawa Mesyuarat Jemaah Menteri pada 5 September 2018 telah bersetuju dengan penubuhan Jawatankuasa Khas Kabinet bagi menyemak dan membuat pengesyoran kepada Kerajaan berhubung pelaksanaan hak-hak dan autonomi Sabah dan Sarawak selaras dengan peruntukan-peruntukan yang terkandung dalam Perlembagaan Malaysia 1963. Tumpuan utama Jawatankuasa Khas Kabinet adalah kepada pelaksanaan perkara-perkara yang terkandung dalam manifesto Pakatan Harapan serta perkara-perkara berbangkit seperti bayaran tunai atau royalti minyak dan sebagainya yang akan dibincangkan secara berperingkat.

Selain itu juga wakil-wakil daripada Semenanjung, Sabah dan Sarawak, yang mempunyai kepakaran dan pengetahuan dalam hal-hal berkaitan, akan dilantik untuk menganggotai Jawatankuasa Khas Kabinet ini. Senarai keanggotaan tersebut akan dikemukakan kepada YAB Perdana Menteri terlebih dahulu untuk persetujuan supaya tidak terlalu ramai dan

NO SOALAN : 20

mengikut kesesuaian kepakaran dan pengetahuan. Senarai yang telah dimuktamadkan akan diumumkan oleh Menteri di Jabatan Perdana Menteri (Undang-undang) dalam tempoh terdekat ini.

Untuk makluman Ahli Yang Berhormat, Jawatankuasa Khas Kabinet ini akan memberikan laporan terperinci kepada Kerajaan dalam tempoh 6 bulan dari tarikh penubuhan untuk pelaksanaan segera. Jabatan Perdana Menteri melalui Bahagian Hal Ehwal Undang-Undang (BHEUU) sebagai urus setia Jawatankuasa Khas Kabinet sedang meneliti perkara di atas, supaya kepentingan semua pihak diambil kira selaras dengan Perjanjian Malaysia 1963.

Sehubungan itu, perkara-perkara yang dibangkitkan Ahli Yang Berhormat, akan turut diambilkira dalam Jawatankuasa Khas Kabinet tersebut sehingga laporan dikeluarkan kepada Kerajaan untuk pelaksanaan oleh pihak-pihak berkaitan.

Sekian, terima kasih.

15 Oktober 2018

Kementerian Hal Ehwal Ekonomi

PEMBERITAHUAN PERTANYAAN

DEWAN RAKYAT, MALAYSIA

**DARIPADA : Y.B. TAN SRI DATUK SERI PANGLIMA HAJI ANNUAR BIN HAJI MUSA
(KETEREH)**

PERTANYAAN : LISAN

TARIKH : 15.10.2018

Y.B. TAN SRI DATUK SERI PANGLIMA HAJI ANNUAR BIN HAJI MUSA [KETEREH] minta **MENTERI KEWANGAN** menyatakan status terkini projek Landasan Kereta Api Pantai Timur (ECRL), berapakah kos yang perlu ditanggung oleh Kerajaan bagi membatalkan projek berkenaan dan sejauh mana Kerajaan telah menjalankan penilaian impak sosial kesan pembatalan projek berkenaan kepada penduduk Pantai Timur.

JAWAPAN

Tuan Yang di-Pertua dan Ahli Yang Berhormat,

Buat masa ini, memandangkan projek ini perlu dikaji semula, Kerajaan telah mengarahkan Malaysia Rail Link Sdn Bhd (MRL), syarikat khusus di bawah milik penuh Menteri Kewangan

Diperbadankan mengeluarkan notis penggantungan (*suspension notice*) kerja serta-merta pada 3hb Julai 2018 kepada kontraktor utama iaitu *China Communications Construction Company*(CCCC). Oleh yang demikian, semua kerja-kerja dan perkhidmatan berkaitan projek ECRL telah digantung sehingga notis selanjutnya dikeluarkan oleh Kementerian Kewangan Malaysia.

Sekiranya projek ECRL dibatalkan, jumlah keseluruhan kos yang perlu ditanggung oleh Kerajaan akan ditetapkan selepas “due diligence” atau semakan yang dijalankan ke atas kerja-kerja yang telah siap.

Anggaran bagi kos yang perlu dibayar ini akan merangkumi pembayaran pinjaman kepada *China Exim Bank* dan bank-bank tempatan bagi pembiayaan projek berdasarkan keperluan kontrak serta kerja-kerja kemajuansehingga 15 Februari 2018 berjumlah RM9.67 bilion. Selebihnya adalah bagi pembiayaan untuk kerja-kerja kemajuansehingga 3 Julai 2018 dan juga pembayaran bagi kos-kos lain berdasarkan terma-terma yang telah ditetapkan dalam Kontrak Kejuruteraan, Perolehan, Pembinaan dan Pentauliahan (*Engineering, Procurement, Construction and Commissioning Contract*). Kos ini tidak termasuk tuntutan oleh pihak kontraktor, *China Communications Construction Company* (CCCC) sepanjang tempoh penggantungan projek ECRL.

Sehingga kini, Kerajaan Malaysia, menerusi anak syarikat operasi miliknya, *Malaysia Rail Link Sdn Bhd* (MRL), telah membayar CCCC

sejumlah RM19.68 bilion. Jumlah RM19.68 bilion ini terdiri daripada (i) bayaran pendahuluan sebanyak RM10.02 bilion dan (ii) bayaran kemajuan sebanyak RM9.67 bilion (seperti di atas). Walau bagaimanapun, bayaran pendahuluan sebanyak RM10.02 bilion bersandarkan bon pendahuluan dengan jumlah yang sama. Bon bayaran pendahuluan ini boleh ditebus oleh MRL untuk mendapatkan semula RM10.02 bilion tersebut. Dalam erti kata lain, sekiranya berlaku senario terburuk maka Kerajaan Persekutuan boleh mendapatkan semula RM10.02 bilion daripada RM19.68 bilion yang dibayar.

Ahli Yang Berhormat,

Buat masa ini, Kerajaan masih belum memuktamadkan hala tuju Projek Laluan Rel Pantai Timur (ECRL) kerana rundingan bagi projek ini masih lagi dijalankan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA,
PARLIMEN KEEMPAT BELAS**

PERTANYAAN : LISAN

**DARIPADA : YB DATUK ZAKARIA BIN MOHD. EDRIS @
TUBAU
[LIBARAN]**

TARIKH : 15 OKTOBER 2018 (ISNIN)

SOALAN NO. 22

Minta **MENTERI HAL EHWAL EKONOMI** menyatakan sejauh mana hasil kajian sudah dijalankan berkaitan pembayaran royalti kepada negeri-negeri pengeluar minyak di negara ini. Apakah kaedah dan mekanisme kajian dijalankan dan adakah pandangan daripada pemimpin-pemimpin Kerajaan negeri terlibat diambil kira.

JAWAPAN

Yang di-Pertua,

Dalam Mesyuarat Pertama, Penggal Pertama Parlimen Keempat Belas yang lalu semasa penggulungan perbahasan menjunjung kasih Titah Seri Paduka Baginda Yang Di-Pertuan Agong pada 1 Ogos 2018, saya telah menyatakan antara lain, secara panjang lebar mengenai bayaran tunai (*cash payment*) atau lebih dikenali sebagai royalti minyak dalam Dewan yang mulia ini.

Saya juga telah menyatakan bahawa Kerajaan bercadang untuk menubuhkan Jawatankuasa Khas Kabinet yang dianggotai oleh wakil-wakil daripada Semenanjung, Sabah dan Sarawak yang mempunyai kepakaran dalam hal-hal berkaitan bertujuan untuk menyemak, mengkaji dan menambahbaik secara adil Perjanjian Malaysia 1963.

Sukacita dimaklumkan bahawa Mesyuarat Jemaah Menteri pada 5 September 2018 telah bersetuju dengan penubuhan Jawatankuasa Khas Kabinet bagi menyemak dan membuat pengesyoran kepada Kerajaan berhubung pelaksanaan hak-hak dan autonomi Sabah dan Sarawak selaras dengan peruntukan-peruntukan yang terkandung dalam Perlembagaan Malaysia 1963. Tumpuan utama Jawatankuasa Khas Kabinet adalah kepada pelaksanaan perkara-perkara yang terkandung dalam manifesto Pakatan Harapan serta perkara-perkara berbangkit seperti bayaran tunai atau royalti minyak dan sebagainya yang akan dibincangkan secara berperingkat.

Selain itu juga wakil-wakil daripada Semenanjung, Sabah dan Sarawak, yang mempunyai kepakaran dan pengetahuan dalam hal-hal berkaitan, akan dilantik untuk menganggotai Jawatankuasa Khas Kabinet ini. Senarai keanggotaan tersebut akan dikemukakan kepada YAB Perdana Menteri terlebih dahulu untuk persetujuan supaya tidak terlalu ramai dan mengikut kesesuaian kepakaran dan pengetahuan. Senarai yang telah dimuktamadkan akan diumumkan oleh Menteri di Jabatan Perdana Menteri (Undang-undang).

Untuk makluman Ahli Yang Berhormat, Jawatankuasa Khas Kabinet akan memberikan laporan terperinci kepada Kerajaan dalam tempoh 6 bulan dari tarikh penubuhan untuk pelaksanaan segera. Jabatan Perdana Menteri melalui Bahagian Hal Ehwal Undang-Undang (BHEUU) sebagai urus setia Jawatankuasa Khas Kabinet sedang meneliti perkara

di atas, supaya kepentingan semua pihak diambil kira selaras dengan Perjanjian Malaysia 1963.

Sehubungan itu, perkara-perkara yang dibangkitkan Ahli Yang Berhormat mengenai bayaran royalti minyak, kaedah dan mekanisme pembayaran, akan turut diambil kira dalam Jawatankuasa Khas Kabinet tersebut sehingga laporan dikeluarkan kepada Kerajaan untuk pelaksanaan oleh pihak-pihak berkaitan.

Sekian, terima kasih.

15 Oktober 2018

Kementerian Hal Ehwal Ekonomi

NO. SOALAN : 23

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA,
PARLIMEN KEEMPAT BELAS**

PERTANYAAN : LISAN
DARIPADA : TUAN WONG CHEN [SUBANG]
TARIKH : 15 OKTOBER 2018 (ISNIN)

SOALAN NO. 23

Minta **MENTERI TENAGA, SAINS, TEKNOLOGI, ALAM SEKITAR DAN PERUBAHAN IKLIM** menyatakan :

- a) sama ada satu kajian sosioekonomi akan dijalankan mengenai kilang Lynas di Kuantan; dan
- b) sekiranya ya, adakah Menteri akan menerbitkan kajian tersebut.

NO. SOALAN : 23

JAWAPAN

Tuan Yang di-Pertua,

Kajian sosioekonomi kilang Lynas Advanced Materials Plant (LAMP) terletak di luar bidang kuasa Kementerian ini. Bidang kuasa Kementerian ini hanya meneliti pembangunan dan pengoperasian dari aspek alam sekitar keselamatan, kesihatan manusia dan alam sekitar.

Walaubagaimanapun, Kementerian ini telah menubuhkan suatu Jawantankuasa Eksekutif dengan objektif khusus kepada penilaian pengoperasian LAMP terhadap aspek keselamatan, kesihatan manusia serta alam sekitar. Ini adalah termasuk lanjutan tempoh masa untuk penstoran buangan terjadual, selaras dengan Peraturan 9, Peraturan-peraturan Kualiti Alam Sekeliling (Buangan Terjadual) 2005.

Sekian, terima kasih.

NO. SOALAN : 24

PEMBERITAHUAN PERTANYAAN BAGI JAWAPAN LISAN
MESYUARAT KEDUA, PENGGAL PERTAMA,
PARLIMEN KEEMPAT BELAS,
MAJLIS MESYUARAT DEWAN RAKYAT

PERTANYAAN : LISAN

**DARIPADA : YB DATO' SRI HAJAH NANCY SHUKRI
[BATANG SADONG]**

TARIKH : 15 OKTOBER 2018

MENJAWAB

SOALAN : 24

YB Dato' Sri Hajah Nancy Shukri [Batang Sadong] minta PERDANA MENTERI menyatakan adakah Kementerian akan mengkaji secara menyeluruh mengenai perlanggaran ataupun ketidakpatuhan Perlembagaan berhubung dengan hak-hak Sarawak dan Sabah.

JAWAPAN:

1. Jemaah Menteri pada 5 September 2018 telah bersetuju untuk menubuhkan suatu Jawatankuasa Khas Kabinet untuk menyemak dan meneliti hak Kerajaan Negeri Sabah dan Kerajaan Negeri Sarawak di bawah Perjanjian Malaysia 1963. Terma rujukan bagi Jawatankuasa Khas Kabinet tersebut antaranya adalah untuk mengenal pasti dan menyemak isu berhubung dengan pelaksanaan hak-hak dan kuasa autonomi Kerajaan Negeri Sabah dan Kerajaan Negeri Sarawak berdasarkan Perlembagaan Persekutuan, Perjanjian Malaysia 1963 dan *Report of the Inter-Governmental Committee 1962* serta memperakukan syor berhubung dengan keperluan untuk memperbaharu kerangka perundangan.
2. Jawatankuasa Khas Kabinet ini bertanggungjawab untuk meneliti dan mempertimbangkan apa-apa cadangan berhubung dengan hak Kerajaan Negeri Sabah dan Kerajaan Negeri Sarawak antaranya cadangan untuk mengembalikan status Kerajaan Negeri Sabah dan Kerajaan Negeri Sarawak sebagai rakan kongsi dalam pembentukan Persekutuan Malaysia dan perkara-perkara lain yang berkaitan dengannya.
3. Persoalan mengenai pelanggaran Perlembagaan Persekutuan berhubung hak-hak Sabah dan Sarawak tidak berbangkit dalam konteks ini kerana Jawatankuasa Khas ini bertujuan untuk memberi tumpuan kepada pelaksanaan hak-hak dan kuasa autonomi Kerajaan Negeri Sabah dan Kerajaan Negeri Sarawak sebagaimana yang telah

termaktub dalam Perlembagaan Persekutuan, Perjanjian Malaysia 1963 dan *Report of the Inter-Governmental Committee 1962*.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA,
PARLIMEN KEEMPAT BELAS**

PERTANYAAN : LISAN

**DARIPADA : TUAN WONG TIEN FATT @
WONG NYUK FOH
[SANDAKAN]**

TARIKH : 15 OKTOBER 2018 (ISNIN)

SOALAN NO. 25

Minta **MENTERI PERUMAHAN DAN KERAJAAN TEMPATAN** menyatakan pelan pembinaan rumah mampu milik di Sabah. Bagaimana Kerajaan Persekutuan bekerjasama dengan Kerajaan negeri dalam pembinaan rumah mampu milik di Sabah.

JAWAPAN

Yang di-Pertua,

1. Untuk makluman Ahli Yang Berhormat, antara perancangan Kementerian Perumahan dan Kerajaan Tempatan (KPKT) untuk menyediakan rumah mampu milik di seluruh negara termasuklah di Sabah ialah melalui pelaksanaan Program Perumahan Rakyat (PPR). Program ini melibatkan kerjasama antara Kerajaan Persekutuan dengan Kerajaan negeri dalam membangunkan rumah mampu milik di negeri masing-masing.
2. Melalui kerjasama ini juga, Kerajaan Negeri turut dilibatkan dalam proses perancangan dan setelah projek PPR berkenaan disiapkan penyerahan akan dibuat kepada Kerajaan Negeri bagi tujuan pengisian dan penyelenggaraan berdasarkan syarat serta kriteria yang telah dipersetujui secara bersama.
3. KP KT sangat mengalu-alukan syor dan cadangan tapak yang bersesuaian dari Kerajaan Negeri untuk melaksanakan projek PPR khususnya di Negeri Sabah mengikut mekanisme permohonan projek yang telah ditetapkan oleh pihak KP KT. Pihak KP KT juga akan meneliti kesesuaian tapak yang dicadangkan dan akan memberikan keutamaan kepada lokasi-lokasi yang mempunyai bilangan setinggan serta permohonan rumah bagi golongan B40 yang tinggi.
4. Untuk makluman Ahli Yang Berhormat juga, berkenaan tapak yang dicadangkan oleh pihak Kerajaan Negeri, pihak KP KT akan menilai kesesuaian tapak berkenaan berdasarkan garis panduan Unit Perancang Ekonomi (EPU), Jabatan Perdana Menteri (JPM). Tapak milik Kerajaan Negeri adalah diberikan keutamaan untuk KP KT melaksanakan PPR ini secara tender terbuka mengikut

NO SOALAN : 25

dasar yang telah ditetapkan oleh kerajaan sekarang. Namun begitu, pelaksanaan pembangunan PPR ini juga tertakluk kepada peruntukan kewangan yang disediakan oleh Kerajaan Persekutuan.

Sekian, terima kasih.

**MESYUARAT KEDUA, PENGGAL PERTAMA,
PARLIMEN KEEMPAT BELAS
PEMBERITAHUAN PERTANYAAN
DEWAN RAKYAT MALAYSIA**

PERTANYAAN : JAWAB LISAN

**DARIPADA : DATUK WILSON UGAK ANAK
KUMBONG
[HULU RAJANG]**

TARIKH : 15 OKTOBER 2018 (ISNIN)

SOALAN : 26

minta **MENTERI PEMBANGUNAN LUAR BANDAR** menyatakan adakah pihak Kementerian bercadang untuk membina Jalan Nanga Mujong ke Rumah Tunku, Nanga Sebiro, Sungai Gaat, Kapit.

JAWAPAN

Tuan Yang Di-Pertua,

Untuk makluman Yang Berhormat, cadangan pelaksanaan Projek Membina Jalan Dari Nanga Mujong Ke Nanga Gaat Terus Ke Rumah Tunku, Nanga Sebiro, Sg. Gaat, Bahagian Kapit telah disenaraikan dan dikemukakan kepada Unit Perancang Ekonomi untuk dilaksanakan di bawah *Rolling Plan* 4, tahun 2019, Rancangan Malaysia Kesebelas (RMKe-11).

Walau bagaimanapun, kelulusan projek adalah bergantung kepada Unit Perancang Ekonomi, Kementerian Hal Ehwal Ekonomi dengan mengambil kira kedudukan kewangan semasa negara.

PEMBERITAHUAN PERTANYAAN
DEWAN RAKYAT MALAYSIA
MESYUARAT KEDUA, PENGGAL PERTAMA

PERTANYAAN : LISAN
DARIPADA : TUAN OSCAR LING CHAI YEW
KAWASAN : SIBU
TARIKH : 15 OKTOBER 2018

SOALAN

Tuan Oscar Ling Chai Yew [Sibu] minta **KEMENTERIAN PERDAGANGAN ANTARABANGSA DAN INDUSTRI** menyatakan apakah langkah untuk menarik pelaburan asing di Sarawak terutamanya di Sibu kerana Sibu amat kekurangan pelaburan asing dan mengakibatkan kekurangan pembangunan.

JAWAPAN

Tuan Yang di-Pertua,

Bagi tempoh tahun 2013 hingga Jun 2018, sebanyak 98 projek perkilangan dengan jumlah pelaburan RM47.19 bilion telah diluluskan bagi Negeri Sarawak. Pelaburan ini dijangka menjana 13,151 peluang pekerjaan. Daripada 98 projek tersebut, 46 projek melibatkan pelaburan asing dengan pelaburan berjumlah RM20.62 bilion. Industri utama yang melibatkan pelaburan asing tersebut adalah industri kimia, logam, elektrikal dan elektronik, petroleum, kayu dan perabot, mesin dan jentera serta pembuatan makanan.

Dalam tempoh tersebut juga, 10 daripada 98 projek yang diluluskan di Sarawak akan ditempatkan di Sibu. Pelaburan daripada projek-projek ini berjumlah RM103.67 juta dan dijangka akan menjana 601 peluang pekerjaan. Daripada 10 projek ini, tiga projek melibatkan pelaburan asing yang berjumlah RM15.67 juta telah dilaksanakan iaitu Han Express Energy Sdn. Bhd. (biomass), Bintulu Lumber Development Sdn. Bhd. (biomass) dan Lik Shen Sawmill Sdn. Bhd. (perabot).

Tuan Yang di-Pertua,

Pada dasarnya, strategi promosi pelaburan oleh Kerajaan Persekutuan adalah berdasarkan kepada daya saing, potensi serta kesesuaian ekosistem pelaburan dan perniagaan di sesbuah lokasi atau negeri. Inisiatif dan insentif Kerajaan Persekutuan bagi menarik pelaburan secara amnya tidak memberi tumpuan kepada mana-mana negeri secara khusus. Ini adalah kerana pemilihan lokasi sesuatu projek pelaburan merupakan suatu keputusan perniagaan berdasarkan kajian dan penilaian yang telah dijalankan oleh pihak pelabur sendiri.

Walau bagaimanapun, Kerajaan sedar akan ketidakseimbangan taburan pelaburan di seluruh negara. Sehubungan ini, Kerajaan berusaha mengimbangi kemasukan pelaburan dengan menawarkan insentif tambahan yang khusus bagi Kawasan Kurang Membangun untuk menggalakkan syarikat baharu atau syarikat sedia ada mengembangkan operasi ke kawasan kurang maju. Insentif ini juga bertujuan meningkatkan aktiviti ekonomi dan peluang pekerjaan dan perniagaan

kepada rakyat tempatan di kawasan-kawasan kurang membangun di seluruh negara, termasuk di Sarawak.

Kerajaan Persekutuan sentiasa bekerjasama dengan pihak Kerajaan Negeri dan agensi-agensi berkaitan dalam melipat gandakan usaha-usaha mempromosikan pelaburan. Bagi negeri Sarawak khususnya, Kerajaan bekerjasama rapat dengan Pihak Berkuasa Pembangunan Ekonomi Wilayah Sarawak (RECODA) dalam menyasarkan pelaburan dalam industri-industri yang berpotensi di Sarawak termasuk di Sibu. Industri-industri yang dikenal pasti berpotensi termasuk aluminium, kaca, petrokimia, keluli, kejuruteraan marin, akuakultur, ternakan, kayu, minyak sawit dan pelancongan.

Selain daripada itu, Kerajaan secara amnya menggalakkan pembangunan industri minyak dan gas di Sarawak. Keluasan negeri Sarawak yang begitu besar dan kemudahan tenaga hidro-elektrik adalah di antara pemangkin utama yang menggalakkan kemasukan pelaburan ke negeri Sarawak. Bagi kawasan Sibu pula, Kementerian ini menyasarkan untuk mempelbagaikan aktiviti dalam sektor perkilangan termasuk yang berkaitan dengan industri perkayuan yang berpotensi untuk diperkembangkan lagi bagi memberi manfaat kepada rakyat tempatan.

Tuan Yang di-Pertua,

Kerajaan sentiasa berusaha menambahbaik dasar dan strategi untuk menarik pelaburan yang berkualiti, termasuk pelaburan langsung asing (FDI) ke semua negeri-negeri di Semenanjung, Sabah dan Sarawak. Usaha ini adalah penting bagi memastikan dasar Kerajaan adalah selaras dengan keperluan negara sekaligus dapat mengukuhkan kedudukan negara sebagai destinasi pilihan pelabur.

Sekian, terima kasih.

PEMBERITAHUAN PERTANYAAN

DEWAN RAKYAT, MALAYSIA

**DARIPADA : Y.B. DATUK TAKIYUDDIN HASSAN
(KOTA BHARU)**

PERTANYAAN : LISAN

TARIKH : 15.10.2018

Y.B. DATUK TAKIYUDDIN HASSAN [KOTA BHARU] minta
MENTERI KEWANGAN menyatakan:-

- (a) senarai penuh Pengerusi dan Ahli Lembaga Pengarah syarikat 1MDB sekarang, termasuk syarikat-syarikat subsidiarinya; dan
- (b) adakah Kerajaan bercadang untuk memulakan penggulungan syarikat 1MDB sekali gus ia ditadbir oleh Jabatan Insolvensi.

JAWAPAN

Tuan Yang Dipertua,

Pada masa ini, Lembaga Pengarah 1Malaysia Development Bhd (1MDB) dianggotai seramai tiga orang iaitu YBhg. Dato' Asri Hamidon selaku Pengerusi Lembaga Pengarah serta YBhg. Dato' Kamal Mohd Ali dan YBhg. Dato' Norazman Ayob selaku Ahli Lembaga Pengarah.

Untuk makluman Dewan yang mulia ini juga, 1MDB kini mempunyai sebanyak 22 subsidiari di mana Menteri Kewangan Diperbadankan (MKD) telah bersetuju untuk menamatkan Ahli Lembaga Pengarah sedia ada dan digantikan dengan pegawai Kementerian Kewangan iaitu YBhg. Dato' Asri Bin Hamidon, YBhg. Datin Rashidah Mohd Sies dan Encik Mohd Hisyamuddin Bin Awang Abu Bakar. Senarai subsidiari 1MDB adalah seperti di **Lampiran**.

Tuan Yang Dipertua,

Kerajaan tidak bercadang untuk memulakan penggulungan syarikat memandangkan pada masa ini siasatan berkaitan penyelewengan 1MDB dan usaha untuk membawa balik aset-aset 1MDB di luar negara masih giat dijalankan oleh pelbagai pihak berkuasa.

Lampiran

LIST OF 1MDB'S SUBSIDIARIES

No.	Entity	Principal activity
Malaysia		
1	1MDB Energy Holdings Sdn Bhd	Investment holding
2	1MDB Synergy Sdn Bhd	Investment holding
3	Ivory Merge Sdn Bhd	Investment holding
4	Merpati Energy (Langat) Sdn Bhd	Dormant
5	Pelita Merparti Sdn Bhd	Dormant
6	Plentitude Mentari Sdn Bhd	Dormant
7	PM Global Energy Bhd	Investment holding
8	PM Power Sdn Bhd	Dormant
9	Powertek Investment Holdings Sdn Bhd	Dormant
10	Sino-Malaysia Holdings Sdn Bhd	Dormant

11	Tadmax Power Sdn Bhd	Property development
12	Tenaga Merpati (Jimah) Sdn Bhd	Dormant
13	Timeline Zone Sdn Bhd	Dormant

Labuan, Malaysia

1	1MDB Energy (Langat) Ltd	Investment holding
2	1MDB Energy Holdings Ltd	Investment holding
3	1MDB Energy Investments Ltd	Investment holding
4	1MDB Energy Ltd	Investment holding
5	Infrastructure Capital Ltd	Investment holding
6	Ivory Point Ltd	Investment holding

British Virgin Islands

1	Brazen Sky Ltd	Investment holding
2	Global Diversified Investment Company Ltd	Investment holding
3	Malaysia Investment Company Ltd	Investment holding

PEMBERITAHUAN PERTANYAAN

DEWAN RAKYAT, MALAYSIA

**DARIPADA : Y.B. TUAN PANG HOK LIONG
(LABIS)**

PERTANYAAN : LISAN

TARIKH : 15.10.2018

Y.B. TUAN PANG HOK LIONG [LABIS] minta **MENTERI KEWANGAN** menyatakan perincian jumlah hutang oleh syarikat-syarikat berikut yang dijamin oleh Kerajaan Persekutuan :-

- (a) hutang sejumlah RM2,600,000,000 oleh Johor Corporation; dan
- (b) hutang sejumlah RM530,146,652.81 oleh Penerbangan Malaysia Bhd.

JAWAPAN

Tuan Yang Di-Pertua,

2. Perincian jumlah hutang oleh syarikat Johor Corporation dan Penerbangan Malaysia Berhad adalah seperti berikut:

(a) Johor Corporation:

Perkara	Butiran
----------------	----------------

Tujuan	Membaiyai penstrukturran semula Kumpulan Jcorp bagi meneruskan matlamat dan fungsi sebagai agen pembangunan ekonomi dan sosio-ekonomi negeri.
Bentuk Pinjaman	Sukuk
Jumlah	RM3 bilion (baki belum selesai: RM2.6 bilion)
Tranches	Tranche 1: RM400 juta (telah selesai bayar) Tranche 2: RM800 juta Tranche 3: RM1.8 bilion
Kadar kupon dan tempoh pembiayaan	Tranche 1: 3.48% (5 tahun) Tranche 2: 3.68% (7 tahun) Tranche 3: 3.84% (10 tahun)
Lain-lain	Kerajaan Negeri Johor sebagai pemilik Jcorp memberi jaminan back-to-back kepada Kerajaan Persekutuan.

(b) Penerbangan Malaysia Berhad:

Perkara	Butiran
Tujuan	Membaiyai pembelian dua buah pesawat Boeing 747-400F
Bentuk Pinjaman	Pinjaman Berjangka (term loan)
Jumlah	RM530,146,652.81
Tempoh pembiayaan	12 tahun
Lender	Bank of Tokyo-Mitsubishi Ltd UFJ, Ltd Labuan Branch
Kadar kupon	LIBOR + 0.3%

3. Sehingga kini, bayaran balik pinjaman oleh Johor Corporation dan Penerbangan Malaysia Berhad adalah baik dan mengikut jadual.

SOALAN NO. 30

PEMBERITAHUAN PERTANYAAN DEWAN RAKYAT

PERTANYAAN : LISAN

DARIPADA : DATUK SERI IR. WEE KA SIONG

[AYER HITAM]

TARIKH : 15 OKTOBER 2018

SOALAN : 30

DATUK SERI IR. WEE KA SIONG [AYER HITAM] minta Perdana Menteri menyatakan status penubuhan Suruhanjaya Bebas Aduan dan Salah Laku Polis (IPCMC) untuk menggantikan Suruhanjaya Integriti Agensi Penguatkuasaan (EAIC) dan bagaimanakah penerimaan warga polis terhadap IPCMC yang pada satu ketika ditentang hebat dan dibantah oleh mereka pada tahun 2006.

JAWAPAN: YB DATUK LIEW VUI KEONG
MENTERI DI JABATAN PERDANA MENTERI

Tuan Yang Dipertua,

Kerajaan sentiasa berusaha untuk menambah baik dan memperkasa Polis Diraja Malaysia selaras dengan Janji 20 Buku Harapan. Bagi tujuan tersebut, Kerajaan akan menubuhkan Suruhanjaya Bebas Aduan dan Salah Laku Polis (IPCMC) dengan menjenamakan semula Suruhanjaya Integriti Agensi Penguatkuasaan (EAIC) sebagai IPCMC yang berfungsi sebagai badan pemantau bebas.

Mesyuarat Jawatankuasa Khas Kabinet Mengenai Anti Rasuah (JKMMAR) yang dipengerusikan oleh YAB Perdana Menteri pada 21 September 2018 telah bersetuju dengan cadangan penubuhan IPCMC bagi menggantikan EAIC. Objektif penubuhan IPCMC ialah untuk menangani isu-isu integriti dan menyiasat salah laku dalam kalangan anggota Polis Diraja Malaysia (PDRM). Dengan penubuhan IPCMC, semua bentuk aduan salah laku akan disiasat secara adil dan menyeluruh, termasuklah isu-isu berkaitan kematian dalam tahanan.

Penerimaan pihak PDRM adalah positif kerana dalam merangka penubuhan IPCMC, Kerajaan mengambil kira semua pandangan pihak yang terbabit **terutamanya daripada PDRM**. Penubuhan IPCMC ini bukan sahaja akan dapat membantu menangani isu-isu integriti pasukan PDRM, malahan akan turut memastikan kebajikan anggota-anggota PDRM akan lebih terbela, mendapat layanan yang lebih baik dan pada masa yang sama dapat membersihkan imej diri mereka memandangkan IPCMC dilihat sebagai badan pemantau bebas yang lebih holistik berbanding EAIC.

Oleh yang demikian, draf rang undang-undang mengenai IPCMC sedang disediakan oleh Kerajaan dengan mengambil kira pandangan terkini semua pemegang taruh.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA,
PARLIMEN KEEMPAT BELAS**

PERTANYAAN : JAWAB LISAN

**DARIPADA : TUAN NIK MOHAMAD ABDUH BIN NIK
ABDUL AZIZ [BACHOK]**

TARIKH : 15 OKTOBER 2018

SOALAN : 31

Tuan Nik Mohamad Abduh bin Nik Abdul Aziz [Bachok] minta **MENTERI DALAM NEGERI** menyatakan langkah untuk memperbaiki prosedur penahanan reman yang melibatkan golongan Orang Kurang Upaya (OKU) seperti yang berlaku dalam kes penghidap autisme, Ahmad Ziqri baru-baru ini.

JAWAPAN

Tuan Yang Di-pertua,

Polis Diraja Malaysia (PDRM) telah pun mempunyai *Standard Operation Procedure (SOP)* bagi urusan tangkapan dan menghadapkan orang-orang yang kena tuduh seperti mana yang di gariskan dalam Perintah Tetap Ketua Polis Bahagian D204. Namun demikian dalam perintah tersebut tidak diperincikan secara khusus urusan pengendalian suspek daripada golongan orang kurang upaya (OKU) dan kategori golongan istimewa yang lain. PDRM menerima baik cadangan ini dan akan membuat penambahbaikan dalam SOP tersebut dalam tempoh yang terdekat ini. Di samping penambahbaikan terhadap SOP tersebut, latihan kepada anggota PDRM turut di rancang bagi mengendalikan kes seumpama ini.

SOALAN NO : 32

**MESYUARAT KEDUA, PENGGAL PERTAMA
PARLIMEN KEEMPAT BELAS
PEMBERITAHUAN PERTANYAAN
DEWAN RAKYAT MALAYSIA**

PERTANYAAN : LISAN

DARIPADA : YB TUAN KARUPAIYA A/L MUTUSAMI

KAWASAN : PADANG SERAI

TARIKH : 15 OKTOBER 2018, ISNIN

SOALAN :

YB TUAN KARUPAIYA A/L MUTUSAMI minta **MENTERI KERJA RAYA** menyatakan adakah Kementerian akan melaksanakan kerja-kerja pembesaran jalan raya bermula dari Bandar Baru ke Kulim dan seterusnya ke Padang Serai kerana langkah tersebut dapat mengatasi masalah kesesakkan yang sering berlaku di lebuh Raya Tol Juru.

JAWAPAN :

Tuan Yang Di-Pertua,

Untuk makluman Ahli Yang Berhormat, berdasarkan semakan melalui stesen bancian dan isipadu trafik lalulintas terkini di laluan tersebut didapati bahawa Tahap Perkhidmatan Jalan (*Level of Service, LOS*) berada pada tahap LOS A di mana **aliran trafik masih lancar**. Di samping itu juga, Kementerian ini telah mengangkat permohonan Projek Menaiktaraf Jalan Bandar Baharu – Kulim (Laluan 136), dari Kulim Hi-Tech Ke Persimpangan Tol Bandar Baharu, Kedah yang merupakan sebahagian daripada laluan yang menghubungkan di antara Padang Serai ke Kulim di dalam Rolling Plan 1 (RP1), RMKe-11. Namun demikian, berdasarkan kepada aliran trafik yang masih lancar serta keutamaan projek, cadangan tersebut tidak mendapat kelulusan dari Agensi Pusat dalam tempoh berkenaan.

Sekian, terima kasih.

PEMBERITAHUAN PERTANYAAN

DEWAN RAKYAT, MALAYSIA

DARIPADA : Y.B. TUAN AHMAD AMZAD BIN MOHAMED@HASHIM (KUALA TERENGGANU)

PERTANYAAN : LISAN

TARIKH : 15.10.2018

Y.B. TUAN AHMAD AMZAD BIN MOHAMED@HASHIM [KUALA TERENGGANU] minta **MENTERI KEWANGAN** menyatakan jumlah bon atau sukuk yang telah diterbitkan untuk membiayai keperluan perbelanjaan Kerajaan pada tahun 2018.

JAWAPAN

Tuan Yang di-Pertua,

1. Keperluan pembiayaan Kerajaan Persekutuan diperoleh sebahagian besarnya daripada sumber dalam negeri menerusi penerbitan bon dan sukuk Kerajaan memandangkan kecairan tunai yang tinggi dalam pasaran kewangan domestik. Sejajar dengan peraturan kewangan

yang telah ditetapkan seperti yang termaktub di dalam Akta Pinjaman (Tempatan) 1959 [Akta 637] dan Akta Pendanaan Kerajaan 1983 [Akta 275], pinjaman hanya dibuat untuk membiayai perbelanjaan pembangunan dan membiayai semula hutang yang matang.

2. Bermula Januari sehingga akhir September 2018, jumlah pinjaman kasar yang dibuat menerusi terbitan bon dan sukuk Kerajaan adalah RM87.5 bilion, iaitu Sekuriti Kerajaan Malaysia (MGS) berjumlah RM41.5 bilion dan Terbitan Pelaburan Kerajaan (MGII) adalah sebanyak RM46 bilion. Daripada jumlah ini, sebanyak RM46.3 bilion adalah untuk membiayai semula pinjaman, manakala RM36.7 bilion digunakan untuk membiayai defisit fiskal Kerajaan Persekutuan. Baki sebanyak RM4.5 bilion adalah untuk membayar balik hutang yang akan matang pada bulan seterusnya bagi tahun 2018.

3. Tuan Yang di-Pertua, berdasarkan Akta Pinjaman (Tempatan) 1959 [Akta 637], dana yang diterima daripada terbitan MGS atau MGII hanya boleh dipindahkan daripada Kumpulan Wang Pinjaman Disatukan kepada Kumpulan Wang Pembangunan. Maka, dalam merangka strategi pengurusan pinjaman Kerajaan Persekutuan, Kerajaan sentiasa memastikan pinjaman yang dibuat adalah mengikut kapasiti kedudukan kewangan Kerajaan iaitu keupayaan

membayar kadar faedah dan pokok. Pinjaman yang dibuat akan dipastikan sentiasa pada kos yang terendah dan dihadkan hanya bagi membiayai perbelanjaan pembangunan, selaras dengan disiplin fiskal yang telah diamalkan.

PEMBERITAHUAN PERTANYAAN

DEWAN RAKYAT, MALAYSIA

**DARIPADA : Y.B. TUAN STEVEN CHOONG SHIAU YOON
(TEBRAU)**

PERTANYAAN : LISAN

TARIKH : 15.10.2018

Y.B. TUAN STEVEN CHOONG SHIAU YOON [TEBRAU] minta **MENTERI KEWANGAN** menyatakan bagaimanakah Kementerian melantik orang-orang untuk menerajui syarikat-syarikat berkaitan Kerajaan (GLC) dalam negara ini, seperti kriteria untuk kelayakan dan adakah lantikan politik masih dibenarkan.

JAWAPAN

Tuan Yang Dipertua,

Untuk makluman Ahli Yang Berhormat, pelantikan Ahli Lembaga Pengarah (ALP) bagi syarikat-syarikat berkaitan Kerajaan (GLC) dibuat berdasarkan kepada hak-hak pemegang saham sebagaimana yang digariskan dalam Akta Syarikat (pindaan) 2016 dan juga *Memorandum & Association(M&A)* syarikat. Dalam urusan

pelantikan individu-individu yang bersesuaian untuk menerajui syarikat GLC ini, antara pertimbangan yang diambilkira adalah kelayakan, pengalaman dan kepakaran seseorang individu itu. Di samping itu, individu berkenaan perlu melepassi tapisan keutuhan oleh Suruhanjaya Pencegahan Rasuah Malaysia (SPRM), bebas dari muflis oleh Jabatan Insolvensi Malaysia dan mempunyai rekod kewangan yang bersih oleh CTOS dan CCRIS.

Pelantikan pegawai kanan bagi syarikat GLC pula dibuat melalui pertimbangan dan persetujuan Jawatankuasa Pencalonan dan Ganjaran syarikat. Antara kriteria yang diambilkira bagi pelantikan pegawai kanan syarikat GLC adalah dari segi kelayakan, kualiti peribadi individu tersebut dan pengalaman dalam industri yang berkaitan.

Sebagai sebahagian usaha menambahbaik tadbir urus syarikat Kerajaan, pelantikan Ahli Politik dalam syarikat-syarikat Kerajaan tidak lagi dibuat melainkan terdapat keperluan yang munasabah dan pelantikan dibuat berdasarkan merit dengan mengambilkira kelayakan profesional, pengalaman serta kemahiran yang bersesuaian dengan operasi dan bidang syarikat yang berkaitan.

PEMBERITAHUAN PERTANYAAN
MESYUARAT KEDUA, PENGGAL PERTAMA
PARLIMEN KEEMPAT BELAS (2018)
DEWAN RAKYAT

PERTANYAAN : LISAN

**DARIPADA : YB DATO' SERI HAJI ABDUL HADI BIN AWANG
[MARANG]**

TARIKH : 15 OKTOBER 2018 (ISNIN)

SOALAN :

Dato' Seri Haji Abdul Hadi bin Awang [Marang] minta **PERDANA MENTERI** menyatakan apakah benar dakwaan pihak Kerajaan bahawa pendakwah terkenal, Dr. Zakir Naik sering merendahkan agama lain.

JAWAPAN: (YB DATO' DR. MUJAHID YUSOF, MENTERI DI JPM)

Tuan Yang di-Pertua,

Saya pohon untuk menjawab soalan ini bersekali dengan soalan nombor 18 bagi sidang pada 27/11/2018 dan soalan nombor 12 bagi sidang pada 6/12/2018.

Selaras dengan Perkara 3 (1) Perlembagaan Persekutuan, Islam adalah agama bagi Persekutuan dan hal ehwal agama Islam adalah di bawah bidang kuasa negeri melalui Jadual Kesembilan, Senarai II, Senarai Negeri, Perlembagaan Persekutuan, maka semua penceramah dan juga pihak berkaitan dari luar negara perlu mendapatkan kebenaran daripada pihak berkuasa agama negeri dan mendapat tauliah daripada Pejabat Mufti Negeri serta pihak keselamatan sebelum sesuatu ceramah dilaksanakan. Para pendakwah yang hendak berdakwah di negara ini perlu melalui tapisan keselamatan yang dilakukan kepada penceramah serta mereka yang terlibat, agar bersesuaian dengan ajaran Ahli Sunnah wal-Jamaah.

Pada masa yang sama, setiap pendakwah yang ingin menjalankan program di negara ini seharusnya memahami keadaan masyarakat di sini kerana Malaysia mempunyai kepelbagaian bangsa, agama dan pelbagai faktor lain. Faktor-faktor kepelbagaian ini perlu diambil kira supaya tidak ada mana-mana pihak yang merasa tersinggung dengan apa-apa kandungan dakwah yang cuba disampaikan.

Ia juga sekaligus akan menjaga imej Islam daripada dilabel sebagai sebuah agama yang tidak mempunyai sifat belas kasihan dan toleransi apabila berbicara mengenai agama lain. Islam adalah agama yang membawa mesej Rahmatan lil 'Alamin.

Selain daripada itu, penekanan kepada aspek dakwah bil hal (dakwah melalui tingkah laku) juga seharusnya dipertingkatkan supaya masyarakat bukan Islam dapat melihat keindahan Islam secara praktikal dan bukan sekadar retorik kosong.

PEMBERITAHUAN PERTANYAAN

DEWAN RAKYAT, MALAYSIA

**DARIPADA : Y.B. TUAN CHAN MING KAI
(ALOR SETAR)**

PERTANYAAN : LISAN

TARIKH : 15.10.2018

Y.B. TUAN CHAN MING KAI [ALOR SETAR] minta **MENTERI KEWANGAN** menyatakan apakah kesan yang akan berlaku jika potongan insurans nyawa dan KWSP bagi pelepasan cukai individu dinaikkan daripada RM6,000 ke RM10,000.

JAWAPAN

Tuan Yang di-Pertua,

Untuk makluman Ahli Yang Berhormat, sehingga tahun taksiran 2018, Kerajaan telah menyediakan 21 jenis pelepasan cukai pendapatan individu yang boleh dituntut oleh pembayar cukai.

Pada masa ini, pelepasan insurans hayat dan caruman KWSP adalah

sehingga RM6,000. Sekiranya pelepasan cukai tersebut dinaikkan, ia akan memberi implikasi yang ketara kepada pengurangan kutipan hasil cukai pendapatan individu yang dianggarkan lebih kurang RM800 juta setahun.

Walau bagaimanapun, Kerajaan akan sentiasa mengkaji kesesuaian dan menambah baik dasar percukaian sedia ada dari masa ke semasa seiring dengan keadaan persekitaran sosio ekonomi negara bagi membantu mengurangkan beban pembayar cukai kesan daripada kenaikan kos sara hidup.

PEMBERITAHUAN PERTANYAAN BAGI JAWAPAN LISAN
MESYUARAT KEDUA PENGGAL PERTAMA,
PARLIMEN KEEMPAT BELAS,
MAJLIS MESYUARAT DEWAN RAKYAT

PERTANYAAN : LISAN

DARIPADA : YB PUAN NURUL IZZAH BINTI ANWAR

TARIKH : 15 OKTOBER 2018

SOALAN :

Puan Nurul Izzah binti Anwar [Permatang Pauh] minta **MENTERI TENAGA MANUSIA menyatakan :-**

- (a) status terkini siasatan Suruhanjaya Pencegahan Rasuah Malaysia (SPRM) berhubung kes penyalahgunaan dana RM300 juta oleh Ketua Eksekutif (CEO) dan beberapa ahli lembaga pengarah Dana Pembangunan Sumber Manusia (HRDF); dan
- (b) justifikasi penamatan perkhidmatan Ketua Eksekutif apabila siasatan masih belum selesai.

PR-1412-L02497

JAWAPAN

Tuan Yang Di Pertua,

1. Suruhanjaya Pencegahan Rasuah Malaysia telah membuka kertas siasatan terhadap beberapa isu yang ditimbulkan oleh pemberi-pemberi maklumat terhadap Dana Pembangunan Sumber Manusia (HRDF). Beberapa individu dalam HRDF serta pihak-pihak yang berkaitan dengan kontrak yang diberikan HRDF juga sedang disiasat. Siasatan masih dijalankan.

Tuan Yang Di Pertua,

2. Kementerian Sumber Manusia atau YB Menteri tidak menamatkan perkhidmatan mantan Ketua Eksekutif, Pembangunan Sumber Manusia Berhad. Sebaliknya beliau melepaskan jawatan secara sukarela.

PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA
PARLIMEN KEEMPAT BELAS
15 OKTOBER HINGGA 11 DISEMBER 2018

PERTANYAAN : LISAN

DARIPADA : DATUK ALEXANDER NANTA LINGGI
[KAPIT]

TARIKH : 15 OKTOBER 2018 (ISNIN)

SOALAN :

Minta **MENTERI INDUSTRI UTAMA** menyatakan dasar terbaru Kementerian ini terhadap pengeluaran buah sawit dan minyak sawit di Malaysia. Mengapa harga belian buah sawit dan minyak sawit di negara kita ini adalah ditahap yang sungguh rendah sekarang. Apakah langkah-langkah yang diambil oleh Kerajaan untuk membantu pekebun-pekebun kecil sawit buat masa sekarang.

JAWAPAN :

Tuan Yang di-Pertua,

1. Untuk makluman Ahli Yang Berhormat, harga minyak sawit mentah (CPO) bergantung kepada pertumbuhan ekonomi, permintaan dan penawaran serta jumlah stok minyak sawit oleh negara-negara pengeluar terutamanya Indonesia yang merupakan pengeluar terbesar minyak sawit dunia.
2. Kejatuhan harga CPO di Malaysia pada ketika ini adalah disebabkan oleh lebihan bekalan CPO di pasaran tempatan. Paras stok CPO telah meningkat dengan ketara kepada 2.49 juta tan pada Ogos 2018 berbanding hanya 1.94 juta tan pada Ogos 2017.
3. Faktor-faktor lain yang juga menyumbang kepada penurunan harga CPO adalah kejatuhan harga minyak kacang soya (SBO) di pasaran antarabangsa. Ini kerana minyak kacang soya merupakan barang pengganti kepada minyak sawit. Selain itu, pengukuhkan nilai matawang Ringgit Malaysia berbanding Dolar Amerika turut menyumbang kepada kejatuhan harga CPO di pasaran tempatan.

Tuan Yang di-Pertua,

4. Kementerian sentiasa proaktif dalam memperkuuh dan menstabilkan harga serta meningkatkan daya saing industri tersebut. Antara dasar Kerajaan pada masa ini adalah promosi minyak sawit dan produk-produk berasaskan sawit yang menepati amalan pertanian baik dan mampan serta dengan mempertingkatkan peranan hubungan diplomatik dengan negara luar. Ini adalah penting demi menjamin pasaran eksport sawit negara. Sebagai contoh, pertemuan di antara Kerajaan Malaysia dengan China semasa lawatan YAB Perdana Menteri telah membawa hasil positif dan inisiatif penting yang akan memudahkan eksport minyak sawit Malaysia dalam jumlah yang lebih besar ke China dan diharap dapat membantu meningkatkan harga minyak sawit di pasaran.

5. Selain daripada itu, Kerajaan juga sedang mengkaji cadangan untuk meningkatkan penggunaan domestik produk sawit melalui perlaksanaan program Biodiesel daripada B7 kepada B10 dalam masa terdekat. Selain membantu meningkatkan penggunaan minyak sawit, langkah ini juga menyumbang kepada pengurangan stok minyak sawit dan seterusnya dapat memberi impak yang positif kepada harga CPO.
6. Inisiatif-inisiatif lain yang sedang dilaksanakan adalah seperti berikut:

- i. Pensijilan Minyak Sawit Malaysia

Skim MSPO akan dijadikan mandatori pada 31 Disember 2019 dan ianya satu langkah ke arah mewujudkan sistem kemampanan yang diterima secara global dalam menjenamakan minyak sawit Malaysia yang seterusnya diterima sebagai pilihan utama pengguna global. Ini akan membuka akses pasaran yang lebih luas untuk pasaran minyak sawit mampan Malaysia di negara-negara pengimport.

- ii. Program Tanam Semula Sawit

Penanaman semula pokok yang tidak lagi produktif ketika harga komoditi berada di paras yang rendah boleh mengurangkan stok bahan mentah komoditi ini.

- iii. Mempergiatkan Aktiviti Penyelidikan dan Pembangunan (R&D) serta Memberi Nilai Tambah kepada Produk Hiliran Berasaskan Sawit

Kerajaan sentiasa menggalakkan aktiviti penyelidikan dan pembangunan (R&D) bagi menjamin kualiti produk sawit di samping meningkatkan nilai tambah produk sawit untuk pasaran eksport.

Sekian, terima kasih.

NO. SOALAN : 39

PEMBERITAHUAN PERTANYAAN BAGI JAWAPAN LISAN
MESYUARAT KEDUA, PENGGAL PERTAMA,
PARLIMEN KEEMPAT BELAS,
MAJLIS MESYUARAT DEWAN RAKYAT

PERTANYAAN : LISAN

DARIPADA : TUAN LIM LIP ENG [KEPONG]

TARIKH : 15 OKTOBER 2018

MENJAWAB

SOALAN : 39

TUAN LIM LIP ENG [KEPONG] minta **PERDANA MENTERI** menyatakan sama ada Kementerian bercadang menggubal undang-undang baru seperti akta “*Freedom of Speech*” dan akta “*Freedom of Information*” agar rakyat tidak takut disaman fitnah oleh Kerajaan yang berkonsep ketelusan.

JAWAPAN:

Tuan Yang di-Pertua,

Penggubalan Akta Kebebasan Maklumat ini perlu dilaksanakan melalui kajian komprehensif dan holistik serta melalui penanda arasan dengan negeri-negeri lain yang mempunyai perundangan seumpamanya. Pada masa ini, terdapat dua enakmen negeri mengenai kebebasan maklumat iaitu Enakmen Kebebasan Maklumat (Negeri Selangor) 2011 [*Enakmen 8*] dan Enakmen Kebebasan Maklumat Pulau Pinang 2010 [*Enakmen 16*].

Selain itu, sesi libat urus akan diadakan dengan agensi Kerajaan yang berkaitan seperti Kementerian Komunikasi dan Multimedia, Suruhanjaya Komunikasi dan Multimedia, Jabatan Peguam Negara dan Majlis Keselamatan Negara. Sesi libat urus turut akan melibatkan pihak media serta Badan Bukan Kerajaan (NGO) yang berkaitan.

Selanjutnya, penggubalan Akta Kebebasan Maklumat turut memerlukan penelitian terhadap undang-undang berkaitan seperti Akta Rahsia Rasmi 1972 [*Akta 88*] dan apa-apa undang-undang lain yang berkaitan.

Turut dimaklumkan bahawa Kerajaan sedang aktif meneliti perkara ini dan memerlukan sedikit masa lagi.

Sekian. Terima kasih.

PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA
PARLIMEN KEEMPAT BELAS
15 OKTOBER HINGGA 11 DISEMBER 2018

PERTANYAAN : LISAN

**DARIPADA : DATO' HASBULLAH BIN OSMAN
[GERIK]**

TARIKH : 15 OKTOBER 2018 (ISNIN)

SOALAN :

Minta **MENTERI INDUSTRI UTAMA** menyatakan apakah hasil lawatan yang telah dibuat oleh YAB Perdana Menteri dan rombongannya ke Negara China dalam memberi impak positif terhadap harga sawit dan getah asli yang semakin merudum jatuh dari hari ke hari.

JAWAPAN :

Tuan Yang di-Pertua,

1. Untuk makluman Ahli Yang Berhormat, pertemuan di antara Kerajaan Malaysia dengan China semasa lawatan YAB Perdana Menteri pada bulan Ogos yang lalu telah mengukuhkan lagi hubungan dua hala di antara Kerajaan Malaysia dan Kerajaan China. Beberapa perkara telah dipersetujui semasa pertemuan tersebut antaranya adalah persetujuan negara China untuk meningkatkan import minyak sawit dari Malaysia sebanyak 500,000 tan dan Kementerian bersama-sama Kementerian Perdagangan Republik Rakyat China (MOFCOM) sedang membincangkan langkah-langkah untuk meningkatkan jumlah import minyak sawit dari Malaysia ke Negara China.
2. Selain itu, tiga memorandum persefahaman (MoU) telah ditandatangani dalam usaha mengukuhkan penggunaan minyak sawit dan getah asli seperti berikut:
 - i. Lembaga Minyak Sawit Malaysia (MPOB) dan Universiti Tsinghua telah menandatangani MoU mengenai Pembangunan Teknikal dan Promosi biobahan api sawit Malaysia. MoU ini membolehkan MPOB memulakan kajian perintis dengan kerjasama Universiti Tsinghua mengenai biobahan api berasaskan sawit dalam bidang pengangkutan (darat, marin dan penerbangan), bekalan haba dan bekalan tenaga untuk industri di China;
 - ii. Sime Darby Plantation Berhad telah menandatangani MoU dengan syarikat pembekal minyak dan bijirin terkemuka milik negara China iaitu COFCO Group Co. Ltd. (COFCO) untuk mewujudkan kerjasama baharu mengenai aplikasi hiliran minyak kelapa sawit dan produk berkaitannya. MoU ini termasuk penyelidikan bersama mengenai manfaat kesihatan minyak sawit, membangunkan keupayaan untuk mengeluarkan minyak sayuran khusus (*specialty fats*) dan mewujudkan aktiviti jualan

dan pemasaran bersama untuk mempromosikan produk sawit yang dinilai tambah di China; dan

- iii. Lembaga Getah Malaysia (LGM) telah menandatangani MoU dengan *Hainan State Farms Bureau* dan *Hainan State Farms Investment Holdings Group Co. Ltd* (HSF). Perjanjian MoU ini adalah mengenai kerjasama dalam teknologi pembinaan jalan raya dengan menggunakan campuran bitumen dan getah beku (*cuplumps modified bitumen (CMB)*) dan automasi serta mekanisasi penorehan getah. Pihak HSF dengan kerjasama LGM akan melaksanakan projek pembinaan jalan raya dengan menggunakan campuran bitumen dan getah beku di Hainan, China pada suku tahun pertama 2019 dengan ujian awal dianggarkan sepanjang 200 km.

Tuan Yang di-Pertua,

3. Lawatan tersebut memberikan kesan positif kepada pengukuhan harga sawit dan getah asli negara. Namun, penting untuk difahami bahawa pergerakan harga minyak sawit Malaysia yang rendah pada ketika ini bukan sahaja dipengaruhi oleh permintaan daripada China, tetapi turut dipengaruhi oleh faktor lain seperti kejatuhan harga minyak kacang soya yang merupakan pengganti kepada minyak sawit. Manakala bagi harga getah pula, peningkatan pengeluaran getah asli dunia oleh pengeluar baharu seperti Vietnam dan Cambodia turut memberi impak kepada harga getah asli negara.

Sekian terima kasih.

NO. SOALAN : 41

PEMBERITAHUAN PERTANYAAN BAGI JAWAPAN LISAN
MESYUARAT KEDUA, PENGGAL PERTAMA,
PARLIMEN KEEMPAT BELAS,
MAJLIS MESYUARAT DEWAN RAKYAT

PERTANYAAN : LISAN

**DARIPADA : DATO' SRI DR. HAJI WAN JUNAIDI BIN
TUANKU JAAFAR [SANTUBONG]**

TARIKH : 15 OKTOBER 2018

MENJAWAB

SOALAN : 41

Dato' Sri Dr. Haji Wan Junaidi bin Tuanku Jaafar [Santubong] minta PERDANA MENTERI menyatakan adakah Jawatankuasa tertinggi Kerajaan dibentuk untuk mengkaji Perjanjian Penubuhan Malaysia 1963, kalau ya, berapa orang dari Sarawak dijemput menjadi Ahli, dan adakah wakil-wakil Sarawak dilantik ke jawatankuasa jikalau dibentuk.

**JAWAPAN: MENTERI DI JABATAN PERDANA MENTERI
YB DATUK LIEW VUI KEONG**

1. Jemaah Menteri pada 5 September 2018 telah bersetuju untuk menubuhkan suatu Jawatankuasa Khas Kabinet untuk menyemak dan meneliti hak Kerajaan Negeri Sabah dan Kerajaan Negeri Sarawak di bawah Perjanjian Malaysia 1963. Terma rujukan bagi Jawatankuasa Khas Kabinet tersebut antaranya adalah untuk mengenal pasti dan menyemak isu berhubung dengan pelaksanaan hak-hak dan kuasa autonomi Kerajaan Negeri Sabah dan Kerajaan Negeri Sarawak berdasarkan Perlembagaan Persekutuan, Perjanjian Malaysia 1963 dan *Report of the Inter-Governmental Committee 1962* serta memperakukan syor berhubung dengan keperluan untuk memperbaharu kerangka perundangan.
2. Untuk makluman terdapat 3 orang wakil daripada Sarawak dalam Jawatankuasa Pemandu Khas Kabinet. Jawatankuasa Pemandu Khas Kabinet ini bertanggungjawab untuk meneliti dan mempertimbangkan apa-apa cadangan berhubung dengan hak Kerajaan Negeri Sabah dan Kerajaan Negeri Sarawak antaranya cadangan untuk mengembalikan status Kerajaan Negeri Sabah dan Kerajaan Negeri Sarawak sebagai rakan kongsi dalam pembentukan Persekutuan Malaysia dan perkara-perkara lain yang berkaitan dengannya.

Sekian, terima kasih.

**PEMBERITAHU PERTANYAAN LISAN DEWAN RAKYAT
MESYUARAT KEDUA, PENGGAL PERTAMA
PARLIMEN KEEMPAT BELAS**

PERTANYAAN : LISAN

**DARIPADA : DATO' ROSOL BIN WAHID
[HULU TERENGGANU]**

TARIKH : 15 OKTOBER 2018 (ISNIN)

SOALAN NO. 42

Minta **MENTERI PENDIDIKAN** menyatakan tindakan Universiti Awam (UA) ke atas cadangan Yang Berhormat Menteri pada 19 Julai 2018 agar UA menjana dana sendiri melalui kaedah penjualan nombor pendaftaran kenderaan. Nyatakan bilangan UA yang telah dan bakal melaksanakannya serta hasil pendapatan yang diperoleh mengikut pecahan UA tersebut.

JAWAPAN

Tuan Yang di-Pertua,

Untuk makluman Ahli Yang Berhormat, selaras dengan hasrat yang telah dinyatakan dalam Pelan Pembangunan Pendidikan Malaysia (Pendidikan Tinggi) 2015-2025 di bawah Lonjakan 5: Kemampanan Kewangan, universiti awam (UA) digalakkan menjana sumber pendapatan baharu untuk mengurangkan kebergantungan kepada dana kerajaan. Antara usaha yang telah diterokai oleh UA adalah:

- i. Penubuhan anak syarikat bagi melaksana aktiviti perniagaan dan pelaburan;
- ii. Dana wakaf dan endowmen;
- iii. Mengoptimumkan pengurusan aset milik UA sebagai sumber pendapatan; dan
- iv. Pengkomersialan produk hasil *Research and Development*.

Disamping itu, Kementerian Pendidikan Malaysia akan berbincang dengan Kementerian Pengangkutan tentang cadangan melaksana penjualan nombor pendaftaran khas kenderaan oleh pihak UA sebagai salah satu usaha alternatif untuk menjana sumber pendapatan baharu. Kelulusan untuk mengeluarkan dan menjual pendaftaran khas adalah di bawah bidang kuasa YB Menteri Pengangkutan.

Jika dipersetujui, perbincangan lanjut berkenaan akan mengambil kira aspek tadbir urus penjualan dan pengurusan penyaluran hasil jualan.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA,
PARLIMEN KEEMPAT BELAS**

PERTANYAAN : LISAN

**DARIPADA : YB TUAN WILLIE ANAK MONGIN
[PUNCAK BORNEO]**

TARIKH : 15 OKTOBER 2018 (ISNIN)

SOALAN NO. 43

Minta **MENTERI PELANCONGAN, SENI DAN BUDAYA** menyatakan apakah usaha Kerajaan untuk membangunkan industri pelancongan supaya Malaysia berada dalam kedudukan 10 destinasi pelancongan utama dunia menjelang 2019. Apakah usaha Kementerian Pelancongan yang telah dan sedang dirancang oleh pihak Kementerian di Kawasan Puncak Borneo yang telah dikenalpasti sebagai salah satu daripada *Malaysia Tourism Belt*.

JAWAPAN

Tuan Yang di-Pertua,

Kementerian Pelancongan, Seni dan Budaya sentiasa berusaha untuk meletakkan Malaysia di kedudukan yang kompetitif. Antara inisiatif-inisiatif yang dilaksanakan adalah:

1. Memperkasakan kerjasama dengan penggiat industri pelancongan tempatan dalam membangunkan pakej pelancongan yang menarik dengan tawaran harga yang berpatutan kepada semua segmen pasaran;
2. Menjalinkan usaha sama dengan syarikat penerbangan bagi menawarkan pakej bersesuaian dengan harga yang berpatutan;
3. Mempergiatkan kerjasama dengan search engine utama seperti Google, Weibo dan WeChat bagi pasaran China serta *online travel agent* (OTA) seperti Booking.com, Traveloka dan Expedia bagi memastikan Malaysia sebagai *top of the mind destination*. Usaha-usaha pemasaran *digital marketing* akan diteruskan melalui penghasilan digital content dan website upgrading bagi memastikan kesinambungan promosi kempen digital;
4. Mengadakan kolaborasi dengan pusat membeli belah utama untuk menarik pelawat asing memilih Malaysia sebagai destinasi pilihan utama;
5. Memperkuuhkan peranan Malaysia Convention and Exhibition Bureau (MyCEB) untuk meyakinkan penganjur-penganjur persidangan/pameran dari luar negara dalam menjadikan Malaysia sebagai destinasi MICE (*Meetings, Incentives, Conferences and Exhibitions*) terunggul. Ini seterusnya akan mendorong lebih banyak penganjuran persidangan bertaraf antarabangsa dan program insentif di Malaysia;
6. Menggalakkan pembangunan produk-produk pelancongan baharu yang unik dan boleh menarik lebih ramai pelancong seperti *The*

Habitat Penang Hill, Escape Theme Park Penang, Desaru Coast Malaysia, Encore Melaka Impression Series dan 20th Century Fox World Malaysia Genting.

7. Mengadakan misi jualan/pemasaran yang menyediakan platform pertemuan di antara penggiat industri tempatan dan luar negara bagi menjalin hubungan dan kerjasama rapat dalam melaksanakan *joint promotion*; dan
8. Mengadakan program *Mega-Fam (Mega Familiarization)* bagi wartawan, syarikat-syarikat pelancongan luar negara, *social influencer*, *key opinion leaders* dan artis daripada luar negara untuk merasai sendiri keindahan dan keunikan Malaysia terutama semasa musim-musim perayaan dan menterjemahkannya dalam bentuk penulisan. Penglibatan peserta-peserta *Mega-Fam* daripada pasaran terpilih akan memberikan impak yang tinggi selaras dengan perkembangan kehendak pengguna masa kini yang rata-ratanya penggemar gajet dan media sosial.

Usaha-usaha meningkatkan kedudukan Malaysia sebagai sebuah destinasi yang unggul ini turut merangkumi inisiatif mempromosikan destinasi-destinasi pelancongan di kawasan Puncak Borneo. Kementerian ini sentiasa menggalakkan penyertaan ahli-ahli industri pelancongan Malaysia dan penggiat industri pelancongan Sarawak di pameran-pameran galakan pelancongan dan misi galakan anjuran Tourism Malaysia mahupun pihak swasta.

Promosi dan pengiklanan bagi destinasi-destinasi pelancongan seluruh negara termasuk Sarawak dilaksanakan menerusi kempen pengiklanan domestik dan antarabangsa yang merangkumi semua jenis media cetak, elektronik, media luaran “*Out of Home*” dan memberi penekanan kepada pengiklanan *online* serta media sosial. Antara inisiatif kempen pengiklanan di saluran televisyen global yang memaparkan Sarawak adalah seperti berikut:

1. *Vignette* berdurasi 60 saat di saluran MTV bertajuk *Malaysia in the Moment (Adventure)* untuk siaran Asia seperti di Filipina, Vietnam dan China;

2. *Vignette* berdurasi 60 saat di saluran AXN bertajuk *Come Follow Me* untuk siaran di India dan Taiwan;
3. *Vignette* berdurasi 60 saat di saluran *National Geographic* mengenai Mulu, Sarawak untuk siaran Asia, Oceania dan Eropah; dan
4. Program *Discovery Channel* bertajuk *You Me Malaysia* selama 30 minit untuk siaran Asia Tenggara, Jepun dan Oceania.

Pada masa yang sama, Kementerian juga telah melaksanakan projek-projek pembangunan pelancongan di kawasan Puncak Borneo dengan peruntukan keseluruhan sebanyak RM1,349,690.00 di bawah Rancangan Malaysia Kesepuluh (RMKe-10).

Sekian, terima kasih.

**PEMBERITAHU PERTANYAAN LISAN DEWAN RAKYAT
MESYUARAT KEDUA, PENGGAL PERTAMA
PARLIMEN KEEMPAT BELAS**

PERTANYAAN : LISAN

**DARIPADA : TUAN HAJI HASBI BIN HAJI HABIBOLLAH
[LIMBANG]**

TARIKH : 15 OKTOBER 2018 (ISNIN)

SOALAN NO.44

Minta **MENTERI PENDIDIKAN** menyatakan apakah perkembangan terkini pembinaan sekolah-sekolah berkelompok di Sarawak termasuk di Limbang.

JAWAPAN

Tuan Yang di-Pertua,

Sehingga kini Kementerian Pendidikan Malaysia (KPM) tiada cadangan untuk membina sekolah berkelompok di negeri Sarawak. Sebaliknya di bawah Pelan Hala Tuju Sekolah Kurang Murid (SKM), Jabatan Pendidikan Negeri (JPN) Negeri Sarawak menyediakan pelan tindakan sekolah-sekolah di Sarawak termasuk di daerah Limbang yang berpotensi untuk digabungkan bagi mengatasi masalah sekolah yang mengalami penurunan enrolmen yang berterusan.

Pertimbangan tentang jarak, kemudahan pengangkutan, kesediaan kanak-kanak untuk bersekolah di sekolah baharu (sekolah induk) serta persetujuan ibu bapa dan masyarakat setempat perlu diambil kira sebelum penyuraian murid ke sekolah induk dibuat. Selain itu, kesediaan sekolah yang akan menjadi sekolah induk juga penting bagi memastikan kemudahan yang terdapat di sekolah induk tersebut dapat menampung murid-murid dari sekolah-sekolah yang akan digabungkan. KPM juga akan mempertimbangkan sekiranya terdapat keperluan untuk membina kemudahan asrama kepada murid-murid bagi memastikan masalah kedudukan sekolah yang jauh dari petempatan dapat diatasi apabila penggabungan dilaksanakan.

RJM05

PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA
PARLIMEN KEEMPAT BELAS

PERTANYAAN : JAWAB LISAN
DARIPADA : PUAN KASTHURIRAANI A/P PATTO
[BATU KAWAN]
TARIKH : 15 OKT 2018 (ISNIN)

SOALAN NO. 45

Puan Kasthuriraani A/P Patto [Batu Kawan] minta **MENTERI PEMBANGUNAN WANITA, KELUARGA DAN MASYARAKAT** menyatakan bilangan permohonan perkahwinan di Mahkamah Sivil, Mahkamah Syariah serta undang-undang adat (customary laws) yang melibatkan pemohon serta pasangan di bawah umur 18 tahun mengikut jantina dari 2008 sehingga 2018 dan adakah pihak polis akan menyiasat lelaki dewasa yang berkahwin dengan kanak-kanak mengikut Akta Kesalahan-kesalahan Seksual Terhadap Kanak-kanak 2017.

**JAWAPAN: YAB DATO' SERI DR. WAN AZIZAH DR. WAN ISMAIL,
TIMBALAN PERDANA MENTERI MERANGKAP
MENTERI PEMBANGUNAN WANITA, KELUARGA
DAN MASYARAKAT**

Tuan Yang di-Pertua,

Akta berhubung perkahwinan di Malaysia ditadbir di bawah beberapa agensi Kerajaan dan bukannya di bawah Kementerian Pembangunan Wanita, Keluarga dan Masyarakat. Sehubungan itu, data berkenaan perkahwinan turut dipegang oleh pelbagai pihak berbeza iaitu:

- i. permohonan perkahwinan bawah umur bagi orang Islam direkodkan oleh Mahkamah setiap negeri dan dipantau oleh Jabatan Kehakiman Syariah Malaysia (JKSM) manakala pendaftaran perkahwinan orang Islam direkodkan di setiap Majlis atau Jabatan Agama Negeri;
- ii. perkahwinan orang bukan Islam di bawah Akta Membaharui Undang-Undang (Perkahwinan dan Perceraian) 1976 dan direkodkan oleh Jabatan Pendaftaran Negara (JPN), Kementerian Dalam Negeri;
- iii. perkahwinan mengikut undang-undang adat di Sarawak direkodkan oleh Majlis Adat Istiadat Sarawak;
- iv. perkahwinan mengikut undang-undang adat di Sabah pula direkodkan oleh Mahkamah Anak Negeri; dan
- v. perkahwinan dalam kalangan orang asli mengikut adat pula direkodkan oleh Jabatan Kemajuan Orang Asli.

Statistik yang diperolehi Kementerian pada masa ini hanya merujuk kepada bilangan permohonan perkahwinan bawah umur atau perkahwinan bawah umur secara umum sahaja dan tiada pecahan mengikut umur dan butiran pasangan mereka.

Bagi perkahwinan orang Islam, berdasarkan data yang dijana melalui sistem E-Syariah JKSM, jumlah permohonan kebenaran perkahwinan bawah umur bagi tempoh 2008 sehingga Jun 2018 mencatatkan sebanyak **11,424 kes.**

SOALAN NO. 45

Berdasarkan data yang diperoleh daripada JPN, sebanyak **5,409 perkahwinan bawah umur** telah dicatatkan bagi tempoh 2008 sehingga September 2018. Manakala data yang dijana daripada Majlis Adat Istiadat Sarawak pula menunjukkan **450 perkahwinan melibatkan kanak-kanak lelaki** (di bawah umur 18 tahun) dan **4,650 perkahwinan melibatkan kanak-kanak perempuan** bagi tempoh 2008 sehingga September 2018.

Kerajaan berhadapan dengan kesukaran untuk meneliti trend sebenar perkahwinan bawah umur di negara ini disebabkan tiada data yang lengkap khususnya bagi pasangan beragama Islam, perkahwinan adat di Sabah, dan perkahwinan Orang Asli di Semenanjung mengikut adat. Data yang direkodkan oleh JKSM pula hanya melibatkan permohonan perkahwinan di bawah umur dan bukannya pendaftaran perkahwinan.

Didapati juga sistem perekodan di sesetengah negeri adalah secara manual yang menyukarkan lagi usaha pengumpulan data perkahwinan bawah umur. Ini berbeza dengan perkahwinan sivil iaitu yang bukan Islam di mana semua maklumat mengenainya direkodkan secara atas talian oleh JPN.

Kementerian sedang mendapatkan kerjasama Jabatan Perangkaan Malaysia dalam usaha memantapkan pengumpulan dan penyelarasan data berhubung pendaftaran perkahwinan, termasuk perkahwinan bawah umur. Ketiadaan data yang lengkap menyukarkan Kerajaan untuk merangka langkah-langkah intervensi ke atas isu berkenaan.

Tuan Yang di-Pertua,

Berkenaan siasatan polis, Kementerian ini menyokong pihak polis untuk menjalankan siasatan sekiranya terdapat elemen pengantunan. Tiada sebarang had dalam perundangan Malaysia yang mengekang siasatan dilakukan oleh polis. Sekiranya didapati terdapat unsur-unsur eksloitasi atau penderaan, pesalah akan disiasat di bawah undang-undang yang berkenaan termasuklah Akta Kanak-Kanak 2001 dan Kanun Keseksaan.

SULIT

SOALAN NO: 46

PEMBERITAHUAN PERTANYAAN DEWAN RAKYAT

PERTANYAAN : LISAN

**DARIPADA : TUAN IBRAHIM BIN TUAN MAN
[KUBANG KERIAN]**

TARIKH : 15 OKTOBER 2018

SOALAN : 46

Tuan Ibrahim bin Tuan Man [Kubang Kerian] minta **PERDANA MENTERI** menyatakan berapakah kos yang ditampung rakyat untuk semua lawatan YAB Perdana Menteri ke luar negara semenjak beliau dilantik sebagai Perdana Menteri.

JAWAPAN: YB DATUK LIEW VUI KEONG

SULIT

MENTERI DI JABATAN PERDANA MENTERI

Tuan Yang Di Pertua,

Untuk makluman Ahli Yang Berhormat, kos keseluruhan lawatan ke luar negara oleh YAB Perdana Menteri dan delegasi sejak dilantik sehingga kini adalah berjumlah **RM6,308,707.66** melibatkan 8 lawatan rasmi. Kos perbelanjaan ini dibayar sewajarnya seperti mana termaktub dalam Akta Ahli Parlimen (Saraan) 1980 (Akta 237) dan perbelanjaan ini merangkumi perbelanjaan pegawai pengiring yang turut serta dalam setiap lawatan YAB Perdana Menteri.

Sekian. Terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA,
PARLIMEN KEEMPAT BELAS**

PERTANYAAN : LISAN

**DARIPADA : TUAN ALI ANAK BIJU
[SARATOK]**

TARIKH : 15 OKTOBER 2018 (ISNIN)

SOALAN NO. 47

Minta **MENTERI PERUMAHAN DAN KERAJAAN TEMPATAN** menyatakan kekerapan kebakaran yang berlaku di kawasan luar bandar, apakah langkah yang akan dilaksanakan oleh pihak Kementerian untuk menambah baik mutu perkhidmatan Jabatan Bomba dan Penyelamat bagi kawasan luar bandar Sarawak.

JAWAPAN

Yang di-Pertua,

1. Untuk makluman Ahli Yang Berhormat, pada tahun 2017, sebanyak 29,356 insiden kebakaran di seluruh negara telah dilaporkan dan dihadiri oleh Jabatan Bomba dan Penyelamat Malaysia (JBPM). Manakala sehingga September 2018, bilangan insiden kebakaran yang telah dilaporkan adalah sebanyak 31,498 kes.
2. Daripada keseluruhan kebakaran yang berlaku pada tahun 2018, 12,810 (40%) adalah merupakan kebakaran di kawasan luar bandar. Jumlah tertinggi kebakaran di kawasan luar bandar adalah merupakan kebakaran belukar dan kebun iaitu 10,116 kes (78.9%), selebihnya adalah seperti berikut:
 - Hutan : 13.85% (1,775 kes)
 - Kebun: 6.4% (826 kes)
 - Rumah Panjang dan tradisional : 0.73% (93 kes)
3. Bagi meningkatkan kualiti perkhidmatan JBPM bagi kawasan luar bandar Sarawak, lebih banyak Pasukan Bomba Sukarela (PBS) akan ditubuhkan bagi memberikan perlindungan kebakaran dan penyelamatan di kawasan-kawasan luar bandar yang jauh dari balai bomba.
4. Pada masa ini, terdapat 386 Pasukan Bomba Sukarela di seluruh negara dengan keahlian seramai 14,508 orang negeri Sarawak merupakan negeri paling banyak menubuhkan Pasukan Bomba Sukarela iaitu 47 pasukan dengan 2,147 keahlian. Berdasarkan perancangan, sebanyak 3 pasukan baharu akan ditubuhkan sehingga Disember 2018 menjadikan bilangan keseluruhan

Pasukan Bomba Sukarela di negeri Sarawak sebanyak 50 pasukan.

5. Selain daripada itu, bagi mengurangkan tempoh masa bertindak (*response time*) di negeri Sarawak yang kini mempunyai 30 buah balai bomba, sebanyak 8 projek balai bomba baharu dicadangkan untuk dibina sehingga tahun 2020 meliputi kawasan Asajaya, Lutong, Sungai Plan, Dalat, Kota Sentosa, Sebauh, Engkilili dan Batu Kawa. Permohonan peruntukan pembangunan akan dibuat secara berperingkat dalam RMKe-11 mengikut keutamaan berdasarkan risiko di kawasan yang terlibat.

Sekian, terima kasih.

SOALAN NO. : 48

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA
PARLIMEN KEEMPAT BELAS**

PERTANYAAN : LISAN

DARIPADA : TUAN CHOW KON YEOW [TANJONG]

TARIKH : 15 OKTOBER 2018 (ISNIN)

SOALAN NO. 48

Tuan Chow Kon Yeow [Tanjong] minta **MENTERI AIR, TANAH DAN SUMBER ASLI** menyatakan dengan terperinci termasuk kontraktor dilantik berhubung kerja-kerja pelebaran lembangan Sungai Pinang sepanjang 1.5 kilometer (km) yang dikatakan akan dimulakan pada April 2019. Adakah peruntukan tersebut merupakan sebahagian projek tebatan banjir bernilai RM1 bilion yang dijanjikan kepada Pulau Pinang sebelum ini.

SOALAN NO. : 48

JAWAPAN:

Tuan Yang di-Pertua,

Status pelaksanaan kerja-kerja pelebaran lembangan Sungai Pinang sepanjang 1.5 kilometer (km) adalah di peringkat penilaian pelantikan perunding bagi melaksanakan kerja-kerja reka bentuk terperinci. Tender bagi kerja-kerja pembinaan akan dilaksanakan setelah reka bentuk terperinci selesai disediakan. Peruntukan projek ini telah diluluskan sebelum isu projek-projek bernilai RM1 bilion.

Sekian, terima kasih.

SOALAN NO. 49

PEMBERITAHUAN PERTANYAAN DEWAN RAKYAT

PERTANYAAN : LISAN

**DARIPADA : DATO' HAJI ABDUL RAHMAN BIN MOHAMAD
[LIPIS]**

TARIKH : 15 OKTOBER 2018

SOALAN : 49

Dato' Haji Abdul Rahman bin Mohamad [Lipis] minta PERDANA MENTERI menyatakan usaha Kerajaan untuk menambah baik ketelusan dan kemodenan sistem pilihan raya di Malaysia sepermula yang terkandung dalam Janji 17 Pakatan Harapan.

JAWAPAN: YB DATUK LIEW VUI KEONG
MENTERI DI JABATAN PERDANA MENTERI

Tuan Yang Dipertua,

Untuk makluman Ahli Yang Berhormat, Kerajaan **sedang meneliti dan mengkaji cadangan-cadangan reformasi pilihan raya** seperti mana yang dinyatakan di dalam “**Janji 17 – Menjamin Ketelusan dan Kemodenan Sistem Pilihan Raya, Buku Harapan**” dan juga pandangan daripada pelbagai pihak seperti Jawatankuasa Pilihan Khas di bawah Parlimen berhubung Penambahbaikan Proses Pilihan Raya (2012), masyarakat sivil, badan bukan Kerajaan, parti-parti politik dan ahli-ahli akademik.

Dalam hal ini, Kerajaan telah menubuhkan Jawatankuasa Pembangunan Sistem dan Undang-Undang Pilihan Raya Malaysia (*Electoral Reform Committee - ERC*) untuk mengkaji semula sistem dan undang-undang pilihan raya di Malaysia. Suruhanjaya Pilihan Raya juga sedang bekerjasama dengan ERC untuk meneliti perkara-perkara tersebut.

Dalam melaksanakan penambahbaikan ini, tempoh masa yang bersesuaian diperlukan sebelum pertimbangan yang sewajarnya dapat dibuat terhadap cadangan-cadangan tersebut.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA,
PARLIMEN KEEMPAT BELAS**

PERTANYAAN : JAWAB LISAN

DARIPADA : YB TUAN CHAN FOONG HIN (KOTA KINABALU)

TARIKH : 15 OKTOBER 2018

SOALAN : 50

Tuan Chan Foong Hin [Kota Kinabalu] minta **MENTERI DALAM NEGERI** menyatakan usaha-usaha Kerajaan dalam menjamin keselamatan pantai timur Sabah, berikutan kes penculikan berulang berlaku baru-baru ini.

JAWAPAN

Tuan Yang Di Pertua,

Keadaan keselamatan di Kawasan Zon Selamat Timur Sabah (ESSZone) adalah dalam keadaan terkawal dan operasi bersepadu di kalangan agensi penguatkuasa berterusan seperti biasa. Sejak ESSCOM ditubuhkan tiada lagi insiden pencerobohan berlaku sehinggalah insiden penculikan dua orang warga Indonesia di perairan Pulau Bodgaya, Semporna pada 11 September 2018.

ESSCOM merangka pendekatan yang lebih holistik dan bersepada bagi memperkemaskan bentuk kawal selia di perairan ESSZone. Antaranya termasuklah:

- (i) memperkuuhkan penempatan Pasukan Keselamatan di daratan sepanjang ESSZone khususnya di kawasan laluan berisiko tinggi yang telah dikenal pasti;
- (ii) mengatur gerak aset laut di sepanjang perairan ESSZone, khususnya yang berdepan dengan laluan-laluan yang dikenal pasti bagi mewujudkan visual *presence and deterrence*;
- (iii) mengatur gerakan pasukan khas (*special force*) dan *quick response force* ke lokasi-lokasi strategik untuk tindak cepat di samping memperaga kehadiran;
- (iv) mengatur gerak vesel yang dilengkapi dengan sistem pengawasan radar, radar *point defence* dari 3 buah pulau, sistem kamera jarak jauh, dan pengawasan pesawat udara;
- (v) perkongsian maklumat dan risikan di peringkat taktikal dan operasi baik secara intra-agensi dan juga dengan pasukan perisikan Filipina;
- (vi) melaksanakan operasi-operasi di darat dan laut sebagai usaha pencegahan dan sebagai memperaga kehadiran (*show of force*);
- (vii) melancarkan operasi-operasi khas menggasak sarang-sarang penjenayah dan tali barut Abu Sayaf Group (ASG) dari semasa ke semasa;
- (viii) memastikan semua bot nelayan dan *tugboat* memasang *Automatic Identification System* (AIS) dan alatan komunikasi;

- (ix) melaksanakan Arahan Perintah Berkurung terhadap 10 daerah ESSZone iaitu dari pukul 6 petang hingga 6 pagi;
- (x) memberikan taklimat keselamatan kepada orang awam termasuklah penduduk kampung di kawasan terpencil dan berdekatan laut, pemilik-pemilik resort dan chalet, pemilik restoran dan juga pemilik premis perniagaan yang berisiko tinggi; dan
- (xi) sentiasa mengkaji semula strategi dan kesesuaian operasi keselamatan dan juga kelengkapan yang sedia ada untuk penambahbaikan pada masa akan datang.

Kerajaan melalui Kerjasama Keselamatan dengan negara jiran seperti kerjasama *Trilateral Cooperation Agreement* (TCA - INDOMALPHI) antara Pasukan Keselamatan Malaysia, Indonesia dan Filipina dan juga kerjasama Bilateral antara Malaysia dan Filipina, Malaysia dengan Indonesia dan lain-lain sentiasa dipertingkatkan dari semasa ke semasa. Esscom telah mengadakan beberapa siri pertemuan dan melaksanakan program RV *Trilateral Maritime Patrol* (TMP) dan telah dianjurkan lebih 13 kali untuk tahun 2018. Antara aktiviti dan kerjasama yang dilaksanakan adalah perkongsian maklumat semasa terutamanya yang melibatkan aktiviti *Kidnapping for Ransom* (KFR) dan Abu Sayyaf Group (ASG) di sempadan perairan Malaysia- Filipina.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA,
PARLIMEN KEEMPAT BELAS**

PERTANYAAN : LISAN
DARIPADA : DR. AZMAN BIN ISMAIL [KUALA KEDAH]
TARIKH : 15 OKTOBER 2018 (RABU)

SOALAN NO. 51

Minta **MENTERI KESIHATAN** menyatakan sama ada Kerajaan akan mewajibkan insurans kesihatan kepada rakyat Malaysia. Kalau benar, apakah telah ada kajian yang telah dibuat dan apakah hasil kajian tersebut?

JAWAPAN

Yang di-Pertua,

Pada masa ini, Kerajaan sedang merancang untuk melaksanakan Skim Peduli Sihat peringkat nasional untuk rakyat kumpulan B40 bagi merealisasikan agenda Kerajaan membantu rakyat berpendapatan rendah sebagaimana Manifesto. Pengumuman berkaitan skim ini akan dilakukan dalam masa terdekat dan pelaksanaannya dijangka akan dilancarkan pada tahun 2019, bergantung kepada kedudukan kewangan negara. Ia bukanlah berbentuk insurans kesihatan dan buat masa ini Kerajaan belum mempunyai sebarang perancangan untuk mewajibkan insurans kesihatan kepada rakyat Malaysia.

NO. SOALAN : 52

PEMBERITAHUAN PERTANYAAN BAGI JAWAPAN LISAN
MESYUARAT KEDUA, PENGGAL PERTAMA,
PARLIMEN KEEMPAT BELAS,
MAJLIS MESYUARAT DEWAN RAKYAT

PERTANYAAN : LISAN

**DARIPADA : YB DATUK SERI DR. RONALD KIANDEE
[BELURAN]**

TARIKH : 15 OKTOBER 2018

MENJAWAB

SOALAN : 52

YB Datuk Seri Dr. Ronald Kiandee [Beluran] minta **PERDANA MENTERI** menyatakan tindakan yang akan diambil oleh Kementerian untuk melindungi rakyat ekoran keputusan Mahkamah Persekutuan menolak prinsip *Derbyshire* dalam *Common Law* dan memberi hak kepada Kerajaan untuk membuat saman fitnah terhadap individu.

JAWAPAN:

Kerajaan mengambil pendirian bahawa seseorang Menteri merupakan ahli politik dan boleh dikritik oleh rakyat berhubung dengan prestasi, tindakan dan tingkah laku beliau. Sekiranya seseorang Menteri atau ahli politik mendapatkan kritikan yang ditujukan kepada beliau sebagai berbaur fitnah, Menteri atau ahli politik mempunyai hak untuk mengambil tindakan terhadap mana-mana individu dalam kapasiti peribadinya sebagai individu.

Berhubung keputusan Mahkamah Persekutuan, ia merupakan suatu keputusan daripada pihak kehakiman yang perlu dihormati sejajar dengan prinsip pengasingan kuasa antara badan perundangan, eksekutif dan kehakiman. Ini bertujuan untuk mengelakkan berlakunya ketidakadilan yang dijangka akan wujud jika kuasa itu dipegang oleh suatu badan tertentu sahaja. Sungguhpun konsep pengasingan kuasa antara kehakiman, eksekutif dan perundangan tidak disebut secara nyata dalam Perlembagaan Persekutuan, namun ia boleh dilihat secara *implicit* khususnya melalui Bahagian IV (Bab 3 bagi Badan Eksekutif dan Bab 4 bagi Badan Perundangan Persekutuan) dan Bahagian IX bagi Badan Kehakiman. Setiap satu badan eksekutif, badan perundangan dan badan kehakiman mempunyai kuasa eksklusif yang berbeza antara satu sama lain dan setiap daripadanya dilindungi daripada pencerobohan (*encroachment*) kuasa oleh yang lain.

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL PERTAMA,
PARLIMEN KEEMPAT BELAS**

PERTANYAAN : LISAN

**DARIPADA : TUAN SHAHARIZUKIRNAIN BIN ABD KADIR
[SETIU]**

TARIKH : 15 OKTOBER 2018 (ISNIN)

SOALAN NO. 53

Adakah Kementerian bercadang untuk membina satu kompleks sukan di Daerah Setiu. (Terengganu)

JAWAPAN

Yang di-Pertua,

1. Untuk makluman Ahli Yang Berhormat, Kementerian Belia dan Sukan buat masa ini tiada perancangan untuk membina kompleks sukan baharu di seluruh negara termasuklah di daerah Setiu. Kementerian hanya memberi tumpuan untuk membaikpulih dan menaiktaraf fasiliti dan kemudahan sukan yang sedia ada sahaja. Kementerian juga amat mengalu-alukan kerjasama daripada pelbagai pihak seperti Kerajaan Negeri, Pihak Berkuasa Tempatan (PBT), Pihak Swasta serta Pertubuhan Bukan Kerajaan (NGO) dalam menyediakan kemudahan-kemudahan sukan di Negara ini.
2. Untuk makluman Ahli Yang Berhormat jua, setakat ini terdapat seratus dua belas (112) kemudahan sukan di Daerah Setiu yang terdiri daripada padang bola sepak, gelanggang badminton, gelanggang sepak takraw, gelanggang bola tampar, gelanggang tennis, gelanggang futsal daerah dan gelanggang futsal 1Malaysia. Sebanyak seratus satu (101) buah kemudahan tersebut adalah di bawah seliaan Kerajaan Negeri. Manakala sebelas (11) di bawah seliaan KBS.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA,
PARLIMEN KEEMPAT BELAS**

PERTANYAAN : LISAN

**DARIPADA : DATO' SRI DR. HAJI ISMAIL BIN IN HAJI ABD.
MUTTALIB
[MARAN]**

TARIKH : 15 OKTOBER 2018 (ISNIN)

SOALAN NO. 54

Minta **MENTERI HAL EHWAL EKONOMI** menyatakan jumlah projek yang diklasifikasikan sebagai berimpak tinggi di mana telah mendapat kelulusan daripada Kerajaan terdahulu yang telah dibatalkan oleh pihak Kerajaan sekarang dan nyatakan sebab-sebab pembatalan. Nyatakan juga kos yang terlibat dan apa perancangan pihak Kerajaan menangani isu berkaitan pembatalan projek-projek tersebut.

JAWAPAN

Tuan Yang di-Pertua,

Untuk makluman Ahli Yang Berhormat, konsisten dengan jawapan Kementerian ini pada mesyuarat penggal pertama Dewan Rakyat yang lalu, Kerajaan tidak berhasrat untuk menangguh atau membatalkan projek-projek pelaksanaan projek-projek yang memberikan manfaat terus kepada rakyat (*people centric and high impact project*) seperti jalan raya, jambatan, bekalan air, bekalan elektrik, keselamatan, kesihatan, sekolah dan rumah ibadat akan diteruskan. Projek-projek sebagainya akan diteruskan pelaksanaannya bagi memastikan kesejahteraan, keselamatan dan taraf hidup rakyat terpelihara terutamanya di kawasan luar bandar. Manakala projek-projek yang ditangguhkan dan dibatalkan pula merupakan projek mega kerana kemudahan sedia ada masih dapat memenuhi keperluan rakyat.,

Ini juga selaras dengan keputusan Kerajaan agar kategori projek mengikut keutamaan yang memberikan manfaat terus kepada rakyat diteruskan sepertimana surat arahan Kementerian Kewangan bertarikh 29 Jun 2018. Arahan Penambahbaikan Tadbir Urus Dan Pelaksanaan Perolehan Kerajaan tersebut telah menggariskan pematuhan seperti berikut:

- a) Projek-projek yang belum dikeluarkan SST dibatalkan atau ditangguhkan;
- b) Bagi projek-projek yang telah dikeluarkan Surat Setuju Terima (SST), projek bernilai RM10 juta ke bawah boleh diteruskan; dan
- c) Bagi projek-projek yang telah dikeluarkan Surat Setuju Terima (SST), projek bernilai RM10 juta ke atas boleh diteruskan dengan syarat dengan kemajuan pelaksanaan tidak kurang 15%. Sekiranya dibawah 15%, projek hendaklah dikaji semula melalui Contract Coordination Panel (CCP) Kementerian pelaksana masing masing. CCP akan menimbang dan memutuskan kesesuaian pelaksanaan atau penamatkan kontrak dengan

mengambilkira jumlah pampasan yang perlu ditanggung oleh Kerajaan.

Pada tahun 2018, sebanyak 5,027 projek dengan peruntukan sebanyak RM46 bilion yang diluluskan di bawah peruntukan Belanja Pembangunan (DE). Setelah semakan dibuat, hanya satu projek dibatalkan dengan peruntukan berjumlah RM5 juta dan 278 projek pula ditangguhkan pelaksanaannya dengan peruntukan sebanyak RM1.767 bilion. Sebanyak 279 projek yang terlibat ini (dibatal/ditangguhkan) merupakan projek belum mula, yakni belum dikeluarkan Surat Setuju Terima (SST).

Projek-projek yang ditangguhkan ini boleh dilaksanakan pada masa akan datang mengikut keutamaan dan keperluan semasa namun ianya tertakluk kepada dasar dan kedudukan kewangan Kerajaan pada masa hadapan.

Sekian, terima kasih.

15 Oktober 2018

Kementerian Hal Ehwal Ekonomi